

武定詩續鈔 二十二 二十三 二十四

14
743
24



743
24



武定詩續鈔卷二十二

張 銓翼南選訂
利津 李佐賢竹朋編次

李文桂

以上俱張銓填諱

先大夫字鏡秋號魯村廩貢官德慶知州 累贈翰林

院編修汀州知府著塞易論語筆記鄉禮正誤古文時

文筆蹟賓州杜太傅文端公李君家傳君嗜讀書喜昌黎

復失由史館議敘州牧選得雲南之路南州調他郡通

判署思茅同知丁父艱服闋選廣東德慶州呈吏議謫

於家又八年卒君之在路南也頻年瘟疫流行至一鄉

無子遺君誓於神曰天道福善禍淫如盡屬當誅是司
牧者咎也宜加於身勿濫及自是疫竟不作又疫死者
棄棺於野蓋巫家之言君爲示禁及捐置義塚州人感
焉敝俗以革其在思茅也車里宣慰司刀繩武禔弱避
緬夷蹂躪潛居內地將十載其族召彝覲踞其地引緬
人稱修好詐取緝武敵盟實將虜之繩武訴於君適聞
緬人至未渡江君曰渡江患成矣諭速傳部落奪舟斷
渡時司存土練江上三百人爲稟調官兵捐募鄉勇團操以
益之揚言江上天兵送宣慰歸境今至矣其族偵之震
懼遁去大府欲序其績君謂一人受功當有數人受過
竟不詳也宣慰既復獻珠犀悉卻不受因卽九龍江立
君生祠又車里與裸黑世相仇殺向得其級則解廳請
賞君論之曰裸黑亦人類也勿擅殺並諭裸黑不得尋
仇亦自是服化焉其在德慶也俗健訟訟以賄成皆故
事然君判決無所徇有案結袖金來謁者君愕然曰何
爲此吾以理斷而以賄終是公亦私也峻拒之州環山
抱江皆官田荒蕪不治乃出示聽開墾民以爲便江岸
多盜劫君添置巡船自往查緝而其風遽息地有蛋戶

業漁託漁埠以生豪強侵奪久失業君勸明界址判歸
蛋民賴以生全者無算凡君所蒞興利除弊尤以教化
爲先尊師儒立講舍以故賢才奮興駸駸迨古在滇在
粵皆有之不具書其自迪化歸也就少時讀書處關軒
楹集生徒課經義註易八卷得末疾遂輟歿之日鄉謚
曰清毅教子曰讀書當希聖希賢甘自暴棄皆無志之
甚者也爲尤
得其要云

寄呈萊峯叔

一在衡山南一在泰山北迢遞斷音書惆悵情何極春去秋忽
來風景遽蕭瑟寒塘楓葉聲長空暮雲色觸目送征鴻奮飛不
可得

端江舟中

泛舟如泛槎。晚泊蘆荻花。天涯千萬里。何處是吾家。望母倚門
閭。白首閱年華。宦海四十載。道遠風濤賒。此生多坎壈。磨竭命
宮差。掛冠腰不折。五斗委泥沙。昔歎古人矯。今羨古人遐。與其
談經濟。毋甯話桑麻。東厨烹葵菽。西園摘棗瓜。承歡奉甘旨。養
志不須奢。優遊脫軒冕。舒卷若雲霞。俯仰聊自足。蓬華樂無涯。
昔非今未是。回顧一長嗟。

感懷

通顯非吾分。名心苦不歇。中歲博一官。遭際屢摧折。直道而事
人。三黜何需說。半途思改更。前後成兩節。譬彼南轅車。安能就

北轍。此身立如山。此志堅如鐵。平且無疚心。何待人照雪。鬪巧
慚未能。吾甯守吾拙。

憶萊峯叔

當日相別灘江側。雪岸梅花鬪春色。今日相思渤海東。蕭蕭黃
葉滿林風。青鐙夜白露秋。怕看月影下簾鉤。銀河一帶長如綫。
難綰離人萬里愁。

讀昌黎詩感懷

詩云。玉川先生洛城裏。茅屋數間而已矣。一奴長鬚不
裹頭。一婢赤腳老無齒。

正定詩集
三
謫離鄉國八千里。茫茫苦海無涯涘。假館入幕佐軍儲。半間茅
店身棲止。一榻容吾膝。兩飯供吾齒。終朝作嫁爲他人。得失無
關心如洗。偷閒玩易復種花。玉川不異洛城裏。先生用奴笑長
鬚。我奴只用山村子。先生有奴兼有婢。少長二奴我足矣。浩蕩
乾坤寄此身。俯仰滄桑一粟耳。舉杯澆愁愁無幾。逍遙容與且
自喜。賜環他日賦歸來。營母窀穸吾心死。

棲霞寺

數里雲峯合。環山曲徑遙。開門詩客到。滿地野花嬌。訪古攀幽
磴。聽泉過小橋。地偏心亦僻。頓覺世緣消。

別隆荷光

斗酒意同傾。君留我暫行。春風桃李岸。曉日漢江城。此地人初
別。明宵夢又成。他鄉自珍重。九萬是鵬程。

題遊僧圖

策杖度蒼烟。行蹤太灑然。眼空寰宇外。人立大江前。有感皆成
幻。無縈卽是禪。紅塵多少客。莫認畫中天。

題坐禪圖

俯仰一亭閒。幽人坐未還。當門環翠竹。隔渡見青山。不了塵中
念。焉知世外閒。披圖心共遠。落落想難攀。

途中和汪四野棠

偶聞花萼詠。俯首一淒然。棠棣君何篤。壘篋我大慙。承歡憐子弱。慰志賴妻賢。千里燕山道。庸奴結夙緣。

登石峯寺元武閣

石峯藏古寺。尋勝上巖梯。躡足凌千仞。凝眸對萬谿。山高村市小。天近嶺雲低。遙指明朝路。匆匆策馬蹏。

遊水濟寺

南來尋勝地。多半是僧房。壁就山高下。籬隨徑短長。林深環法座。竹密蔭禪牀。坐久渾忘去。茶清滿院香。

寄德溫叔

喚回清枕夢依稀。觸處離情欲奮飛。三五良宵聽漏永。七千驛路讓春歸。粵西山水甲天下。岱北乾坤近帝畿。何日歸來共明月。好聯佳句對清輝。

登金山騰海亭

萬里空青入望收。洪波浩蕩向東流。江心湧出孤山寺。天際飛來一葉舟。飄渺樓臺疑閬苑。微茫城郭辨瓜州。聳身咫尺雲霄近。不待乘槎犯斗牛。

漁家樂次王純修韻

三
五
幾忘城市有生涯。一葉浮來便是家。把釣閒投千疊浪。隨隄飽
看四時花。往來鼓櫂歌明月。高下乘潮趁落霞。自覺江湖風味
好。朱門繡戶不須誇。

山居吟

短垣矮屋足清華。山下田園處士家。五日和風十日雨。三畦野
菜兩畦花。詩情蕩漾隨流水。圖畫依稀認晚霞。天末故人如見
訪。綠陰相對煮新茶。

題胡丕勳草堂

綠陰深處百花堂。獨闢芳園徑未荒。三面開軒臨水鏡。四時邀

客泛霞觴。疏風香送芙蓉沼。斜月輝穿薜荔牆。自是幽人多妙
賞。北窗高臥傲羲皇。

漁翁

臨風一曲唱漁歌。信手絲綸得意多。家寄沙洋新舊口。人隨春
水往來波。白雲紅日江千里。綠樹青山影半蓑。漢代嚴陵今在
否。吾將停櫂問蒼阿。

塞外將歸張瀛山司馬贈別索和卽步元韻

把盞無言各黯然。何堪回首憶當年。昆明湖上聲華地。嘉峪關
前沙漠天。與君同官滇南
八載今來同戍身世同悲燕客筵。風塵怕說祖生鞭。

瓜期有代咸歸去。半畝閒園手一編。

被謫那分前後時。堪憐共廢蓼莪詩。與君皆丁母憂江流無盡他鄉淚。

塞月難明羈客思。白髮催人秋易老。烏紗誤我悔嫌遲。終天大

憾今將釋。浩蕩天恩永戴之。

旅舍

旅館蕭條夜。寒鐙寂寞時。離情誰共訴。惟待月明知。

晚晴

雨過晚園新。微風漾綠蘋。清霄一片月。獨照異鄉人。

八月初九夜夢中作

客意東流水。鄉心北度鴻。何當隨雨去。萬里馭長風。

憶荏平諸幼弟

數歲初相見。未知兄弟親。他年逢異地。應問是何人。

揚店道中

秋風揚店路。落日滿平原。兵燹亂離後。蕭條三兩村。

吹簫

一曲清簫月滿山。幽人獨坐小樓間。三更夜靜西風冷。頓覺身

閒似鶴閒。

河干閒眺

幾簇茅檐隔野烟。晴雲漠漠水田田。佳人自掉輕舟去。穿入垂楊落照邊。

晚泊

輕舟夜泊望模糊。寺隔雲屏半有無。遙指松林犬吠處。寒烟深幕一燈孤。

遊某氏花園

桃花臨下鳥關關。繚繞晴烟白晝閒。聞得歌聲尋不見。漁郎指過綠楊灣。

清明

尋春恰值暮春天。杏豔桃緋各鬪妍。忽聽歡聲花外轉。隔鄰嬌語送鞦韆。

重陽

晴雲紅日曉風涼。路轉峯回下野塘。黃酒今朝誰共醉。萬山影裏過重陽。

閒吟

讀罷窗頭未竟書。開門晴旭映茆廬。閒情步過槐陰去。檢點花苗手自鋤。

大明湖雨望

依稀畫舫霧中過。裊裊垂楊著地拖。不辨歷亭何處是。滿湖風雨響秋荷。

途中即景

烟村處處課農桑。隔樹茅檐護短牆。一路東風香不斷。野花催趁馬蹏忙。

新店和壁間韻

經過此地一停驂。風月清涼興未酣。客夢今宵何處所。襄江東去漢江南。

題畫

松林曲曲障洄汀。點染雲亭上翠屏。筆到懸崖收未得。烟痕一抹衆峯青。
萬壑千巖指下生。小橋流水認分明。當年曾識廬山面。疑向君家畫裏行。

李別周叢亭

八月論交一夕分。天邊鴻雁悵離羣。今宵醉我非關酒。未飲醅醪已半醺。

觀馬隊

驪黃牝牡各調馴。虎脊龍文辨假真。漫道此中無驥在。不逢伯

樂老風塵

題臨流罷釣圖

拋卻絲綸懶下竿。石磯兀坐且閒觀。臨淵何必魚堪羨。只愛清流不起瀾。

李文杰

字慕衡先大父從姪嘉慶戊辰舉人

菊花

乞得靈芽護早春。秋籬轉瞬幾枝新。經多雨露終嫌瘦。見慣炎涼始耐貧。籠月偶留真色相。傲霜詎改舊精神。相看盡日科頭

坐徑外何勞送酒人

李文綬

叔父字若甫號心齋先大父姪嘉慶己卯副貢官陽穀

教諭殉節

贈國子監助教

郡志忠節傳咸豐四年二月

時同官某已告歸有欲借之出避者文綬不從及賊至如潮湧邑令守東門文綬守北門告邑宰曰我輩食祿義當死賊逾數萬禦之以三百不練之勇如驅羊入虎口不如此以死守之邑宰毅然揮衆去中流矢罵賊不屈死文綬聞之曰門不可守吾司鐸文廟吾死所也奔至廟端坐待賊賊至以戈擊之文綬揮以刃賊連擊左右手刀墜乃以頭撞賊馬益厲賊怒劈之噴血及賊面罵不絕口遂遇害上優卹之加贈國子監助教銜予雲騎尉世職○邵廣文奉詔李廣文殉難紀畧公幼讀書穎悟工詩詞為公伯蓮峯先生所器重及長恂恂却

遜語言如不能出諸口已卯中副車考取教習以知縣
用請改校官期不廢讀初任鄒縣教諭丁憂起復再任
陽穀教諭實心訓迪士皆宗仰甲寅二月粵逆入境公
偕縣令文公守城門城陷奔至文廟待賊賊至問公何
人公曰我利津李某教官也死毛速殺我賊怒以戈擊
公首公揮以刃賊擊右手墜地左手捨刃劈賊賊又刺
公左手手刀俱墜公以頭撞賊馬益厲賊怒甚劈公兩
耳及額公噴血及賊面罵不絕口賊遂刺公頸公橫神
案前時有公幼僕李狗兒者伏案底窺公死不覺失聲
賊拉出脅之從狗兒不敢拒從至臨清遁回陽穀故得
述公死狀甚悉賊去後陽邑士人斂公尸於明倫堂側
公子至改殯公以水沃面血盡面如生重加冠服焉公
以詩書舊族不善理生計一生清苦見人退讓無疾言
遽色遇強暴不與校而見危授命凜凜大節竟出人意
表云○吾叔詩不止此遇難後稿俱散失幸趙余田
表姪錄存數十首借鈔補入家集不過十之一二耳

荷塘

荷池小立清風往來浪搖花影容與無猜

題釣臺

春波浮綠春草多幽釣臺突兀壁立汀洲中有佳士無欲無求

長風被體濯足清流讀騷一過啖茶一甌仰視雲起意態夷猶

偶隨漁子調笛與謳隨處可樂何必神州

謁岳忠武王祠

君忘二帝慚相計一身固痛矣王之心哀哉王之遇

習靜

遠與塵世絕習靜息諸想藏琴不解彈論文多心賞偶酌便成

醉後恣偃仰。呼童起開門。雪花大如掌。忽憶嶺頭梅。乘興已
神往。憑高一縱目。地迴心彌廣。杳杳寺鐘鳴。悠悠野炊上。遙見
空林間。寒鴉宿三兩。乾坤供盼睽。頃刻羅萬象。幻想詎成空。求
珠如象罔。

和宋僧守銓句

月夜不成眠。訪僧過山寺。漱玉聽泉聲。隨意停雙屨。到門鶴忽
飛。向我來路去。

偶成

門無剝啄聲。長日饒佳趣。手把秋水篇。獨坐花深處。微風時一

吹。落紅不知數。蝴蝶若有情。飛來襟上住。

立秋和竹朋姪韻

一葉墮涼吹。秋意無近遠。年華逝水流。滔滔何時返。感此懷故
人。歎息花深處。蘭茝含清芬。莫誤擷芳去。

和子癡姪秋籬元韻

依依村落賸斜陽。猶有疏籬護晚香。幾點幽花餘慘碧。一鉤明
月伴昏黃。藤蘿蔓抱風中蝶。荳蔻根嗁雨後螿。得以淵明清坐
未。白衣人至滿天霜。

述近況答友

武定詩集金
彈指年華鬢已斑。茅齋聊復就清閒。牆坊賸有三竿竹。窗隙嵌
來一角山。酒爲遣愁常獨酌。詩嫌率意屢經刪。蕭然漸覺深居
慣。花月多情與往還。

詠白蓮

天然高韻厭羣芳。洗盡鉛華作淡妝。佛界由來空是色。仙姿端
合素爲裳。澄潭水淨雲留影。午夜香清月滿塘。珠箔銀屏人似
玉。幾回吟賞幾評量。

詠雪

聽雪

誰將玉戲問天公。響徹寒宵一枕中。窗紙錯疑喧驟雨。檐鈴無
奈又高風。驚回幽夢衾如鐵。攪和繁聲漏滴銅。卻憶蘆汀舟夜
泊。穩眠篷底有漁翁。

踏雪

行行山腳復橋頭。一徑鴻泥爪印留。野寺尋詩偏耐冷。前村沽
酒爲澆愁。當階漫惜瓊花碎。礙路偏如落葉稠。踏徧寒郊翹首
望。五雲深處是皇州。

嚼雪

冰擬聰明玉擬姿。嘗來清冷齒平知。醍醐味溢茶香外。沆漉甘

回酒醒時。能沁心脾。應解熱。但消烟火不妨遲。巖山甜雪參同異。細嚼瓊囊有所思。

繪雪

雲影迷離一徑斜。憑將筆妙點詩華。烟嵐山色樹藏寺。水墨江天人泛槎。寫意偶添鴉作陣。繪聲無術蟹爬沙。灞橋更寫敲詩客。折得梅枝半著花。

去榆山誌感

來時門巷柳依依。燕子營巢計未非。看到池荷花欲吐。有人相贈蜀當歸。

賦獻長楊氣似虹。誰教頭腦笑冬烘。疏簾清簟楸枰冷。又是匆匆一局終。

日日烟嵐賞薜蘿。素心人對樂如何。無端淚向臨歧灑。好夢成時時不多。

歸去何曾挂一塵。苦無長策可療貧。飄零命薄潯陽婦。又抱琵琶訴與人。

詠秋 鈔二十

秋雨

連朝微雨弄輕寒。雁陣倉皇蟲語酸。更惜幽花嬌怯甚。低垂清

淚倚闌干

秋雲

半似羅紋半水紋。烟霞映帶共氤氳。誰云天上秋雲薄。應比人情厚幾分。

秋潭

百丈飛泉落上方。一奩鏡影浴寒光。漫言澈底澄清甚。自有蛟龍在內藏。

秋江

水墨江天入畫圖。秋風吹送片帆孤。舟人莫說波濤險。敵得人

心一半無。

秋色

秋光一片共誰尋。近水遙山淺更深。縱費丹青難寫照。都將淡墨付雲林。

秋聲

紛紛木葉雁南征。入耳淒清動客情。自是工愁兼善病。不須埋怨到秋聲。

秋窗

竹樹陰清月上遲。宜人最是嫩涼時。阿儂別有傷秋感。十載青

鐙兩鬢絲。

秋院

小窗鐙火讀書聲。露下風高近二更。自爇鑪香耽夜坐。桐陰搖漾十分清。

秋稼

禾稼如雲處處同。一年心力瘁南東。辛勤作苦團團樂。田野猶存太古風。

秋織

永夜淒清風露多。篝鐙來往不停梭。朱門一樣盈盈女。歌舞叢

中豔綺羅。

秋砧

砧杵聲聲月上時。邊關肯使寄衣遲。金閨亦有同仇志。不向深秋感別離。

秋柝

天街人靜月如霜。拆響沈沈入夜涼。底事偏驚雲際雁。分飛零亂不成行。

秋笛

獨倚高樓百感生。滿天風月正淒清。有人怕說山陽事。莫作一

番鳴咽聲。

秋鈴

一夜風聲間雨聲。淒涼蜀道夢難成。挑鐙擬譜淋鈴曲。觸緒千愁萬恨生。

秋柳

露冷風淒又一時。牽情回憶碧絲絲。於今憔悴條長短。不為勞人縮別離。

秋花

屈曲闌迴亞字紅。含烟冒雨一叢叢。幽花自合多幽恨。絕代佳

人空谷中。

秋葉

林下蕭蕭落葉時。哀蟬聲裏影離披。含情亦欲題紅葉。寫出幽懷好寄誰。

秋蔬

一畦寒脆飽經霜。清味偏宜淡泊腸。何必珍奇誇陸海。算來終是菜根香。

秋蝶

閱盡紅酣與綠肥。南園風景已全非。伶俜雙翅十分瘦。猶戀餘

香不忍飛。

秋蟲

風露年來已慣經。新涼池館草青青。無情最是朱門客。訴盡秋心總不聽。

李文萼

族叔字樓輝。荆巖公孫。歲貢。

登千佛山

抱郭千峯矗。環山一徑斜。佛龕連石鑿。殿鼓帶雲過。積翠描螺黛。濃青趁鵲華。禪房舒遠眺。小坐試新茶。

遣懷

數椽茅屋暫棲身。几淨窗明不受塵。論事多翻千古案。栽花得占四時春。交疏每冀逢佳士。詞寡何妨對俗人。謝卻紛華安樸拙。吾將自號葛天民。

廢園

疊石移花憶昔年。荒涼賸得草芊芊。頽垣尚有莓苔長。枯樹空餘葛藟纏。水涵陂塘蛙亂聚。風摧屋瓦雀爭穿。熙朝勤課農桑業。欲變臺池作甫田。

詠秋 鈔六

秋雨

曲奏淋鈴聽未終。繁聲和漏響壺銅。綠蕉窗外淒無月。黃菊籬
邊瘦怯風。入夜涼痕添枕簟。吟詩疏韻滴梧桐。小樓芳事從頭
憶。花落鶯啼一夢中。

秋霜

鐘落豐山夜未央。五更青女任翱翔。鴛鴦瓦際風初起。蟋蟀堂
前月正涼。作客鏡中傷鬢白。懷人澤畔賦葭蒼。伊誰行李辭茅
店。迹認橋頭印一行。

秋聲

無端百感逐愁生。况值淒清衆籟鳴。蟹咽蛩吟蕉葉徑。風斜雨
細豆花棚。無邊木落秋霜冷。幾處砧敲夜月明。萬戶千門聽不
盡。春聲回憶最關情。

秋色

全消濃綠褪殷紅。一片蕭疏奪化工。圖畫染成偏近淡。繁華劫
盡頓歸空。蒼涼晚景題梧葉。佳麗芳容賸菊叢。更愛秋山工點
綴。丹黃錯落滿林楓。

秋山

奇峯數點露孱顏。且喜牆低好看山。暮靄青圍仙洞古。疏林紅

閉寺門閒。參差鬢髮無妨瘦。秀削芙蓉未許攀。明淨如妝難寫。照教人閣筆憶荆關。

秋村

踏徧山村更水村。郊原秋色杳無垠。園林葉落難藏屋。籬豆花開恰對門。旅雁捎來涼月色。歸羊踏破夕陽痕。登場納稼田家樂。圖繪幽風古俗存。

湯婆

製等餅鼻異金鬻。蘭湯傾注熱能禁。須防漏洩三緘口。詎抱慈悲一片心。入夢先溫孤客席。臨眠預暖老人衾。夫人竹氏如承

寵。莫賦白頭重苦吟。

感懷

蕭齋兀坐類逃禪。性命而今圖苟全。關塞烽烟飛羽檄。蘧廬風雨老詩編。雄心亦覺磨難盡。失足終憂裹不前。伏櫪儻然逢伯樂。猶堪千里一揚鞭。

詠史

焚書

祖龍謀事太迂疏。竹簡烟消社稷墟。一炬阿房騰烈焰。原遺火種在焚書。

銷鋒

并吞六國復何爲。詐力徒矜德不綏。十二金人收鐵盡。烏知博浪有飛椎。

鴻門

撞殘玉斗計成空。大宴鴻門釋沛公。他日鴻溝誰失約。重瞳尙有丈夫風。

烏江

八千子弟過江來。蓋世英雄安在哉。可惜范增先棄去。濤聲嗚咽有餘哀。

虞兮

爲君環帳舞蕭騷。宛轉鐙前泣寶刀。一個美人難護庇。拔山蓋世氣空豪。

當爐

一曲琴心感不勝。卽君意氣正飛騰。當時酒肆蕭條甚。那有黃金聘茂陵。

歸國

風沙漠漠捲雲旂。贖得峨眉塞上歸。不有阿瞞能念舊。此心空逐雁南飛。

驪宮

賜浴華清池水香。天生麗質盡明皇。須知私拜雙星夜。多少眉
峯鎖上陽。

武定詩續鈔卷二十三

利津 張 銓翼南選訂
李佐賢竹朋編次

李崇照

族兄字曉輪。號宗山。巨濤公孫。道光己丑進士。直隸卽

用知縣。著四書講義。史鑑精義。宗山文稿。郡志文苑傳

恃事繼母以孝聞。幼弟豐照繼母出也。恐其廢學。館於

外必攜之。豐照入庠。貢成均。皆其教也。崇照才優。學邃。

為文立就。不事起草。弱冠名噪山左。由拔萃登鄉榜。旋

捷南宮。以知縣試用。後輔生平潛心經史。肆力伊洛。紹

述間有發明之志。又著史鑑精義四書講義。不欲示人。

或間聞其說。則提要鉤元。皆前人未發之蘊。書法秀潤。

詩得唐音。需次保定聽斷。明決大府。欲委以劇邑。檄符未受而卒。同僚咸悼惜不已。○宗山兄吾業師也。生平為詩文甚夥。然不自珍惜。隨作隨棄。今文稿尚存未梓。詩已無存。僅得二首。

春雪

瓊英滿樹映窗紗。春冷無花別有花。楚客高歌曾詠雪。武陵迷望不成霞。楊枝未老先飛絮。茗戰初逢試煮茶。綺陌尋芳應有待。且分清韻鬪尖叉。

和子癡弟秋籬元韻

柴門一徑淡斜陽。籬眼疏疏透冷香。豈蔓曲蟠輕點碧。菜花零亂半篩黃。層霄影落橫空雁。老圃寒生徹夜蠶。莫道秋芳盡消

歇扶持晚菊傲嚴霜

李上賢

從兄字希亭。號子癡。別號癡道人。先叔祖秀峯公本生

孫。布衣。兄性穎悟。讀書能文。未嘗應試。淡於榮祿。布衣終老而不愠。惟以詩酒自娛。善書亦工繪事。兼山水花鳥人物。家貧無子。晚年惟以鬻畫自給。至今吾鄉人得其遺墨。猶抵兼金也。作詩頗多。而未刻稿。曾自錄百餘首付余。今為選存若干首。

題畫

羣山合沓。古木縱橫。雲間風靜。泠泠泉聲。

晴嵐擁四圍。流水環幾曲。亭午不逢人。琴聲出修竹。

雨過寒潭清。日落山光遠。松徑無人行。閒雲生冉冉。

題山雲萬變圖

亂雲欲埋山。山山露頂脰。昂首呼天風。一一吹出岫。雲怒轉週遮。恃強如爭鬪。膚寸幾何時。混茫溢宇宙。萬態逞離奇。徒爾顏增厚。有時伎倆窮。消藏如恐後。一笑天爲開。還我青山舊。

晚眺

酒罷正醺然。蓬門一閒眺。牛羊下括時。松頂餘殘照。棲鴉未成陣。啞啞呼羣噪。西風忽捲來。落葉滿懷抱。

送友

無可贈君行。攜來酒盈斗。飲罷卽揚鞭。慎勿輕回首。

讀吳梅村聽女道士卜玉京彈琴歌感賦

長歌代哭聊排悶。才人潦倒佳人恨。滄桑感慨託焦桐。磊塊難平起方寸。梅村遺老挂冠去。賸水殘山悲失路。玉京悟道脫紅塵。卸卻舞衫衣緇素。虎邱山下恰相逢。無限淒涼同道故。金徽玉軫發清商。縷縷如慕還如訴。更深漏滴泣銅龍。明珠傾瀉晶盤露。離鸞別鵠入悲吟。一絃一柱傷客心。似言寂寞無人問。天涯何幸逢知音。曲罷秦淮憶妾家。大功坊底認狹斜。六朝金粉繁華地。更勝迷樓並館娃。暖翠媚香歌玉樹。鸞簫鳳管調箏琶。

武定詩集金
平康女伴矜絕技。才名豔說董與沙。中山更有如花女。二八盈
盈工笑語。聆音識曲劇聰明。皓齒明眸無伴侶。官家重色選蛾
眉。薰風殿裏教歌舞。北地那知宗社傾。南朝正把新聲譜。大風
捲地西北來。一夕千里長淮開。鐵馬踏翻桃葉渡。歡場驚散舊
歌臺。紅顏黃屋全灰土。賸有棲鴉噪古槐。飄零末路山塘寺。長
物攜來惟綠綺。一彈再鼓天地空。說盡興亡無限事。梨園不是
李龜年。能將天寶遺恨傳。潯陽更異商家婦。詎抱琵琶過別船。
梅老爲作聽琴歌。淚比江州司馬多。

步墨卿弟見贈元韻

有竿莫釣渭河濱。有書莫上平原人。壺中歲月夢中身。且憑樽
酒駐頽神。君不見世人名利奔走頻。年年辜負梨花春。那得黃
石洪崖與結鄰。共場東海之水濯我衣衫塵。

老君洞

老君久與塵世遠。白雲縹渺東西崦。古洞峻嶒閱歲華。千盤螺
髻封苔蘚。昔年紫氣函關來。雖抱仙骨猶凡胎。燒丹鍊藥幾千
載。倏忽變化凌九垓。長嘯斜跨青牛去。天空海濶無定處。此地
猶傳古洞存。興亡歷盡不知數。歎我身世類蜉蝣。過此翻增無
限愁。

大雪

雲模糊風栗烈。松濤拂亂鳥飛絕。柴荆晝掩無人行。前谿凍合水聲咽。僵臥自笑袁安拙。偎徧蘆花寒似鐵。開門拭眼看青山。失卻青山惟見雪。霏霏漠漠難分別。郭索爬沙行未輟。一天柳絮間粉蝶。飛飛高下頗復頡。或疑天女性好潔。碾取廣寒水晶屑。又疑素娥銀剪刀。剪出六花花不缺。梅花難辨微聞香。竹枝低壓欲折節。忽有大片來如掌。填平陵谷封車轍。收拾天地入冰壺。萬家烟火一時滅。老農預賀麥有秋。寒液入地消蝻孽。詩人乘興不知寒。灞橋驢背自怡悅。醉倒橋南賣酒家。好句甯對

俗人說。我有新詩書不得。十指如椎凍欲折。

題江天風雪圖

風林蕭索羣鳥呼。灘沙凍折老蒲菰。迷漫白絮飄江湖。千山悉變白頭顱。鴻雁爪印偎寒蘆。荒原草偃難藏狐。有客尋梅日易晡。寒驢不行迷前途。雲痕水墨同模糊。萬里乾坤一紙鋪。過橋急覓文君鑪。金貂脫換酒百壺。醉捉禿筆寫成圖。此景安後難描摹。

釣臺

釣臺水淮陰侯。釣竿拋擲重瞳愁。釣臺水桐江人。羊裘著破驚

星辰淮陰侯將相矣。桐江人男子耳。男子如生將相已死。

晚過雲門寺

空山塵境絕。古寺夜光微。林靜月初上。鐘聞僧未歸。老猿驚客到。野鶴背烟飛。小立東風裏。松花落滿衣。

醉中口號

我本謫仙僑。頭銜署醉侯。齊梁無輩偶。唐晉想風流。春水江南櫂。秋風冀北樓。疏狂人不識。去矣嬾回頭。

舟中晚興

四面蒼烟起。從容放畫橈。戍空寒鳥聚。江靜老魚跳。山角撐斜

日。蘆根沒晚潮。今宵何處泊。雲外指金焦。

舟中夜泛

夜半寒侵骨。開門霜滿船。沙明餘蟹火。罾挂冷漁烟。素月忽騰海。繁星自挂天。此時休弄笛。腳底有龍眠。

重過都門地藏菴

五載經游處。回頭迹已陳。翎疏憐鶴病。衲碎覺僧貧。古壁誰留句。空梁暗墜塵。拈花諸佛笑。爲我證前因。

郊遊

纔著阮孚屐。身疑到畫屏。柳添新雨翠。山裏暮烟青。村市沽春

武定詩集
醉農歌帶笑聽。牧童牛背穩。笛韻曳前汀。

立秋之夕風雨淒然攬枕口占

枕簟涼於洗。秋從此夜添。雨聲攪漏急。風力射窗尖。貧病全身共癡狂。雨字兼年來佳味少。差覺睡鄉甜。

秋夕

四壁蟲聲起。疏簾乍捲時。露深花睡早。窗小月來遲。選甕開新釀。巡牆讀舊詩。唯憐燈影瘦。病骨尙支離。

習靜

習靜吾家事。悠然閱古今。日烘茅屋暖。雲護竹窗深。著想皆魔

劫。忘機便佛心。一團活潑意。明月滿空林。

夢中作

草逐三春綠。山留百代青。死生真傳舍。天地老居停。運蹇神難助。祠新鬼亦靈。升沈何必問。看月下疏櫺。

臥雲亭

百疊盤螺頂。高亭古洞隈。壁聯孤岫轟。門對萬山開。下幔留雲宿。推窗待雨來。詩懷應更遠。攬勝且銜杯。

黃昏

黃昏人語靜。頓覺俗塵稀。好月來松榻。輕風透葛衣。開籠容鶴

步彈竹逗螢飛。詩思渾無賴。還敲賣酒扉。

題航海圖

回首雲台路。曾經破浪歸。己巳歲自海州青口浮海歸里風騎掀海立。雨疾挾山飛。擊楫心空壯。乘槎願已違。披圖經廿載。感舊倍依依。

遊螺峰

山險疑無路。雲開別有天。奇峰吞落日。怒石咽飛泉。鴉噪千林雨。僧歸兩袖烟。梵宮何處是。清磬一聲圓。

遣懷

濕雲輕罨綠窗紗。獵獵清風幔影斜。蟻走花甌爭結陣。蜂喧竹

鳴欲排衙。詩因寫意情偏適。酒遇無聊興轉賒。習嬾奚童呼不到。自吹鑪火煮新茶。

梅花

閱盡繁華欲杜門。梅花繞屋自成村。羅浮夢斷春無主。驛路人歸月有痕。一鏡澄潭空色相。數峯殘雪逗香魂。林逋去後誰知已。賸我與卿伴曉昏。

桃源別場子農

此生何必計沈浮。但遇同心願已酬。筆陣逢君真可將。子農工書醉鄉除我更無候。身名未必千秋賤。世事原應一笑休。羊角風多

春漸老。飛花吹滿木蘭舟。

晚泊

蒲菰風起水紋長。有客停橈臥夕陽。千里碧雲蒸暮雨。半山紅樹醉新霜。酒因排悶耽成癖。語怕驚人漸減狂。珍重交秋詩骨瘦。呼童檢點寄來裳。

家居卽事

謝徧門前問字車。閒庭如水靜無譁。池牽宿藻魚兒柵。梁補春泥燕子家。抱甕喜澆新茁笋。扶籬偏護欲開花。棋枰斂後頻呼酒。一醉酣眠到日斜。

冬日閒居

梅花香裏掩柴荆。借病辭賓省送迎。酒是風前聞處美。裘因雪後著來輕。夜鑪撥火烟成篆。晨甕敲冰脆有聲。更不追呼雞犬靜。合家團坐飽藜羹。

秋水

無復清歌唱采蓮。賓鴻影落洞庭烟。白蘋風急侵漁坂。紅蓼花疏泊釣船。沙靜時容閒鷺聚。潮迴應護蟄龍眠。中央定有伊人在。註到南華第幾篇。

客中春盡日

江城口暮亂嘯鴉。泥絮心情負歲華。九十春前人病酒。三千里
外客思家。榆錢散漫青蚨老。木筆摧殘白玉瑕。爲問東君誰唱
別。雨絲風片正橫斜。

和吳臥廬踏青元韻

東風吹漲柳絲烟。春色撩人憶舊年。綠蘸三篙桃葉渡。紅燒十
里杏花天。濛濛舞絮鞦韆底。漠漠香塵蹴鞠前。約畧今朝拌一
醉。青錢早向杖頭懸。

紫陌迢迢午晝晴。村簫一曲喚香餳。桃初展笑頻窺燕。柳未成
眠欲逗鶯。拾翠人歸春有夢。浮觴宴罷水無聲。誰家陌上青驄
馬。遊冶花間自在行。

秋日書懷

萬事拌歸春夢婆。五陵豪氣半銷磨。貪吟未釋樽前卷。慣睡難
降飯後魔。短壁蝸涎經雨亂。荒階鳥迹入秋多。何堪宋玉頹唐
甚。坐對西風漾薜蘿。

自遣

拋盡閒愁賸有癡。霜華偷染鬢絲絲。十年紫塞重歸後。半枕黃
梁未醒時。問字人疏門閉早。司花婢嬾菊開遲。連朝檢點青山
賣。忙煞營邱筆一枝。

自嘲

每自生憐轉自嘲。半生結習愧難消。畫多寫意無藍本。詩取陶情慣白描。隱逸襟懷人忘世。英雄肝胆氣凌霄。可知月旦千秋後。名列癡狂第幾條。

菊花

回首炎涼歲月侵。巡籬相賞自清吟。經霜始見凌霜節。出世原無傲世心。品到孤高歸冷淡。香能含蓄耐追尋。多應欲買秋光住。滿地閒拋如許金。

春草

望斷天涯綠未齊。春風吹上宵娘隄。縱橫漸欲妨人屐。淺薄猶難沒馬蹏。一夜池塘新夢醒。六朝金粉夕陽低。銷魂又送王孫去。柳岸青青灞水西。

秋籬

沿徑橫斜背夕陽。荳花雖老尙餘香。堆來落葉三分紫。界破秋英幾點黃。密雨有情留病蝶。淒風無力咽寒螿。誰同詩客拌憔悴。淡月疏星五夜霜。

秋日寄吳蓼坡孝廉觀立

秋味年來客路嘗。輭紅踏處又驚霜。蓮歌唱斷方塘冷。菊酒盛

來老獲香。半世浮名勞畫卷。一生知己謝奚囊。鄉關悵望音書杳。數徧青天雁幾行。

同吳夢坡寒窗夜話

林梢眉月挂纖纖。不怯輕寒懶下簾。紫塞前遊春夢短。青燈夜話酒杯添。千秋事業文章在。一代風流主客兼。慚愧於今無好句。也分險韻鬪吟籤。

江上口占

鷺伴鷗盟任往迴。數椽新結碧谿隈。依花補網篩紅藥。借石敲鍼損綠苔。雲物自饒宏景宅。風波不到子陵臺。蓑衣好換橋南

酒醉倚清風看月來。

春暮漫成

亂紅零落海棠枝。花檻新晴春晝遲。歸燕誰家迷舊壘。鳴禽何處借高枝。一生知己應推酒。萬事輸人不但棋。賸有北窗堪寄傲。甜鄉睡足日斜時。

自遣

不學風流不學禪。虛無打破卽真詮。花開奇樹香歸土。月印空潭魄在天。入世已拌身是客。前生安見我非仙。未能解脫塵緣盡。猶滯蓬萊淺水邊。

偶成

紅塵休看看青山。江北江南任往還。舊緒安排詩卷裏。新愁點綴畫圖間。梅花帳暖融香夢。竹葉樽深駐醉顏。莫怪毫無些子事。倚狂偷得半生閒。

白燕

懶向烏衣逐隊誇。雙襟綺素倍清華。珠江翦水春無迹。晶箔窺巢玉不瑕。對舞偏宜攬柳絮。此生端合隱梨花。勸君莫向朱門去。王謝梁空舊夢差。

與竹朋弟話舊

北馬南帆閱歷頻。湖山佳處卻抽身。稽康性懶難爲客。阮籍囊空不救貧。說劍幾曾逢俠士。聯吟何必定詩人。一枝柔櫓歸來好。風月無邊是舊鄰。

題畫

丹嶂忽吞日。空江欲拍天。爲愁風浪險。繫穩釣魚船。樹杪孤烟直。雲根一徑斜。黃昏人不見。滿地落松花。

道中聞鷓鴣

斜日淡征衣。秋風倦馬馳。一聲行不得。家隔萬山西。

和竹朋弟詠菊

鈔二

看菊

經秋花事半離披。冷眼相逢出世姿。珍重孤芳容易老。莫辭風露立多時。

移菊

由來高士出山遲。荷鍤殷勤勸駕時。祇爲人間聲價重。難教秋色老疏籬。

梨花

名花掩映月昏黃。品自傾城不在香。折取一枝羞插帽。年來衰鬢有清霜。

南御河橋訪然乙兄不遇

雲痕如畫日微茫。一路蟬聲送夕陽。倚徧闌干三十六。兼葭秋水白蒼蒼。

題畫

春滿層巖雪盡消。閒雲如絮擁山腰。東風不惜兼金貴。細冶新黃鑄柳條。

東風漠漠柳毵毵。幾處嬌鶯語正酣。人似飛花無管束。也隨春水過江南。

平湖一望碧田田。小艇人來唱采蓮。萬柄荷花深不見。歌聲只

正定詩續錄
在綠雲邊

蓬門斜對夕陽開。不見幽人踏碧苔。料爲秋窗詩思渴。前村賒酒未歸來。

路遶秋山翠幾盤。上方鐙火隱雲端。幽人采藥歸來晚。謾謾松風草閣寒。

題美人葬花圖

流光一瞬惜年華。海樣春愁付落花。恐被東風誤吹去。似儂飄泊到人家。

爲孟兩山翰博畫貓蝶並題

卓午名花倚檻開。春駒得意任徘徊。狸奴漫作爭獮勢。他是莊生夢裏來。

題松鶴圖

百尺松梢倚翠微。碧天高處鶴雙歸。料應戀慣青山住。懶向紅塵再去飛。

方丈蓬壺山外山。松風長嘯五雲間。神仙不問滄桑事。流水無心鶴夢閒。

雨後

濕雲捲盡夕陽斜。小筍掀泥觸落花。寂寞荒庭人不到。一谿新

水叫私蛙

歸途立春懷吳門陶處士

滿地新泥雪乍消。江南回望路迢迢。先生此日門前柳。綠到春風第幾條。

風箏美人

嬾從金屋鬪嬋娟。纔著春風便欲仙。怪絲輕盈飛不去。情絲一縷爲誰牽。

閒居

蠅頭蝸角悟全非。好閉柴關臥翠微。詩夢乍回香篆冷。一籬疏

雨荳花肥。

城東晚步

烟柳籠隄噪暮鴉。綠莎深處踏晴沙。逢人欲醉文君肆。問住橋南第幾家。

寄吳蓼坡

宵深酒盡倒殘瓶。漫拭漉箋醉未醒。寫到半行忽閣筆。瀟瀟疏雨打窗櫺。

丙子重遊江南看山作

一角烟螺天外孤。新詩欲賦客腸枯。渾如好友經年別。盼到桐

武定詩續錄
逢話轉無

秦淮卽事

丁字簾前問狹斜。一樓香霧罨窗紗。未知蟬鬢人何處。軟語聲聲喚送茶。

樓上銀缸徹夜燒。爲貪清話暫停簫。美人也解興亡恨。斜倚熏籠絮六朝。

虎邱

埋劍無從問舊因。空餘片石峙嶙峋。怪他遊客雙雙眼。不向名山向美人。

漂母祠

隻眼能憐胯下兒。行人千古認荒祠。儻無大將登壇日。漂盡寒流世豈知。

和人七夕元韻

銀潢終古淡青霄。劃斷相思路一條。聞道仙人慣飛渡。如何也用鵲填橋。

松

一嘯驚飛萬壑雲。谿光山色欲平分。風雷且莫成龍去。大廈中間正待君。

武定寺讀抄

卷二十三

七

梅

歷盡冰霜劫後身。縱無色相也精神。年來高臥空山雪。不管人間別有春。

鄉思

連宵風雨病相如。盼斷征鴻並鯉魚。偏是鄉心無著處。有人倩讀寄來書。

題太湖石

玲瓏幾片比峯蓮。何處飛來不計年。一自補天人未識。祇今冷落水雲邊。

偕諸昆季歸自濟南

明湖深處泛烟霞。攜手同乘八月槎。檢到歸裝先自笑。一囊詩草半肩花。

雪中為安治齋工部畫梅

漫天風雪正橫斜。冷落孤山處士家。休信袁安真箇臥。硯池呵凍寫梅花。

初抵雲間書懷

朝夕唯應霞可餐。臨流結網得魚難。千秋寄語馮驩斂。不遇田文莫浪彈。

武定寺讀沙

卷二十三

寒砧敲落一樓霜。有客憑欄思正長。誤信江南風味好。鱸魚終
遜菜根香。

春夜

燈花如豆酒盈瓢。又向天涯度此宵。貪睡奚奴呼不起。一簾春
雨夜瀟瀟。

夜雨

托避春愁入醉鄉。橫眠徹夜雨淋浪。不知窗外頭番笋。放出烟
梢幾許長。

消夏

一叢蕉葉三竿竹。地僻伊誰載酒過。簾外輕風窗外雨。得來清
韻較人多。

身閒恰與懶相宜。戶外炎涼總未知。買取谿藤三十幅。半臨書
稿半抄詩。

漏點沈沈午晝長。槐陰卻暑柳陰涼。困移短榻池頭臥。荷氣隨
風入夢香。

暮蟬聲斷溼螢飛。簾捲黃昏暑漸微。明月似嫌人黯淡。碎篩花
影上羅衣。

北窗

武定詩續鈔

卷二十三

北窗吹送好風多。槐影沈沈釀睡魔。自料心清無熱念。夢魂應不傍南柯。

聞杜宇

天涯蹤迹慣驚春。枝上何勞勸語頻。爲問逢人說歸去。聽君歸去有誰人。

由吳興至杭紆道歸里

匆匆此日戒長途。祖帳驅歌一事無。卻謝多情山色好。送人雙槳過西湖。

論詩

得句長吟倦卽休。詩情不動莫強搜。時人怪底無眞賞。錯把天機當應酬。

李豐照

族兄字炳南。巨濤公孫。道光乙酉優貢。官曲周知縣。

詠古

我懷東方朔。俯視漢公卿。正諫雜詼諧。迹濁心自清。壽世文章在。何用感慨生。蓋世眞氣節。何必激昂成。滑稽與神仙。悠悠少眞評。

我愛陶靖節。甯靜足天真。酒陪東籬菊。詩譜無絃琴。松頂巢歸

鶴空山停閒雲。儻戀五斗米。桃源安可尋。

我愛李青蓮。詩筆出乎類。長歌復短吟。頽然花下醉。天子重仙才。中官捧硯侍。笑傲祇自如。豪狂不可二。撈月大江心。生死渾閒事。

古意

兒時學拈鍼。爭刺鴛鴦好。胡爲二三年。轉輸從前巧。刺到雙鴛鴦。便覺心繚繞。花樣自鮮新。人心自煩惱。此意有誰知。自問亦難曉。相彼遵渚鳥。飛飛欲何之。昔我寄書去。開緘知幾時。借爾雙飛

翼。致我相思詞。願郎勿拋棄。曰歸莫遲遲。回頭忽自瞋。被他鸚鵡知。

皎皎長空月。上我紗窗爨。熒熒短燈檠。光照羅幃滿。思量心上事。怪他好夢短。烟痕一縷青。中夜起開眼。彷彿篆成字。一吁忽吹散。

聞雁

鴻雁何處來。嘹唳天邊度。疑爾有傳書。聲聲喚不住。

贈子癡兄

大隱隱在東海濱。青蓮摩詰並此身。興酣落筆驚鬼神。仗劍三

尺走頻頻。冀北秋雨江南春。吁嗟乎不逢伯樂九方歎。誰識驥足埋風塵。

採蓮曲

採蓮採花莫採子。蓮子香清蓮心苦。試將蓮子比儂心。心苦難訴淚如雨。

漆園城

不涉禪機不類仙。南華秋水悟真詮。觀魚樂寄濠梁外。化蝶魂歸夢覺前。古樹婆婆依斷岸。荒城寂寞鎖寒烟。登臨詩客抒憑弔。鵬背逍遙何日還。

偶成

求僊佞佛悟全非。座繞清風月上扉。新茁蘭芽經宿長。勤澆竹筍入秋肥。學能爲己在初減。貧不求人債漸稀。閒與諸兒商夜讀。好教他日佩牙緋。

春夜聽雨寄懷張畫船廣文

暮雨瀟瀟水閣前。天涯有客夜遲眠。頻思往事都疑夢。乍了前因未是禪。牆角空懸橫斗劍。杖頭又盡買山錢。誰家樓上教歌舞。一曲隨風到耳邊。

暮春

式三序讀少

卷二十三

三

武定詩續金
九十春光過隙駒。年來猶愧辱泥塗。未能投筆從戎事。贏得空
鉤作釣徒。故土鶯花千里夢。旅窗風雨一燈孤。不知楊柳橋邊
客。又點銀鉶索酒無。

聞子癡兄將來都寄懷

長安市上悵離羣。一朵仙雲乍捧君。信有詩才追供奉。還將畫
筆襲將軍。他鄉難得鴿原聚。此日休教雁影分。預擬沽春人共
醉。對牀風雨細論文。

再寄子癡兄

賦罷閒居試遠遊。吟鞭遙指海門秋。微名似我真雞肋。癡墨如

君逼虎頭。驛路尋香風滿袖。客窗敲句月當樓。詩情近在龍潭
水。可許壘麈便唱酬。

病中有感

冷淡生涯鐵硯磨。蓬門闔寂少人過。孤聽夜雨身疑客。瘦怯春
風病是魔。拌斷情緣歸短夢。難將心事託微波。朝來又報花時
節。惆悵年華去太多。

寄懷子癡兄暨汲滋子芬竹朋諸弟

臨流把釣觀魚浦。帶月同登駐鶴樓。回首鄉園悵離別。關心昆
季劇風流。人誇二陸逢青眼。乙未子芬登賢書竹朋入詞館我笑三人共白頭。

子癡汲滋與
余同入老境
莫譜平沙琴一曲
桑乾雪阻雁行留

感懷

漫將錦瑟數年華
微志難酬祇自嗟
韓老送窮終不濟
柳州乞巧向誰誇
學疏敢說文憎命
道遠空教夢到家
綈贈何人憐范叔
閑門雪蘖又橫斜

摘詠聊齋故事詩成又題

去留行止總難圖
預怯春城唱鷓鴣
有簿堪稽聊點鬼
無經可講愛聽狐
後身醒卻前身夢
沽酒還提戒酒壺
志怪搜奇書再讀
一丸寒月上吟鬚

寄汲滋子芬兩弟索吾鄉糟魚白酒

雪窗寒對一燈紅
心到家園身客中
願效放翁求趙璧
爭如張翰趁秋風
舉杯邀去筵誰共
借箸籌來計未工
北上公車春有約
定分鄉味到冬烘

偶占

潦倒名場久客中
伏雌漫說擬飛雄
勉爲屢賣非逃富
猶有徒行不哭窮
風月隨身應注簿
江湖奮迹待張篷
爲嘲同學諸年少
未識誰猿誰化蟲

悼亡鈔三

伴余終窶未嫌貧。婦道兼全仗一身。此後窮途如再哭。伊誰婉
語慰愁人。

人生最苦傷心事。事到眼前心尙猜。莫是歸甯戀慈母。清明節
過不曾來。

死生緣斷竟如何。擬撇酸辛淚更多。妒煞牛女緣分永。年年一
度鵲填河。

傷情

鈔四

前已賦悼亡。今重賦。故以傷情別之。

命乖不悔嫁黔婁。家計艱難賴展籌。猶記牛衣同臥日。背人拭

淚慰窮愁。

撫愛阿戎逾所生。依依膝下見真情。由來不信蘆花變。伯姊諸
姑有定評。

魂歸寢夢景依依。便似當年久別歸。畢竟相逢無一語。教人猜
恨是耶非。

依枝繞樹久單栖。豈是伯勞性不移。報道故園春色好。於今休
信子規啼。

李啟賢

先兄字印潭。號繼之。亦號汲滋。先大夫長子。諸生道光

辛巳保舉孝廉方正選曹縣訓導

郡志義行傳啟賢父知德慶州緣事請成

西陲啟賢隻身隨侍備歷艱辛人謂不負所舉四字迨父赦還歸里啟賢事親居喪悉如古禮弟佐賢由詞垣出守汀州屢迎致之卒不往惟語以清廉居官無以家事為念而樂善好施不少吝邑宰普匡以清廉罷官留滯省垣邑人醵錢助資斧啟賢始終其事約閣邑紳士公舉節孝共得三百餘人為請旌表選授曹縣訓導

未赴任卒

和若甫叔偶成元韻

厭聞剝啄聲。吾自尋吾趣。身世笑攘攘。何是立足處。攜壺醉花陰。不問君平數。一枕曹騰過。邯鄲有誰住。

立秋步竹朋弟韻

年光逝水流。韶華隔漸遠。金井下梧桐。一葉驚秋返。西風送新涼。涼透竹深處。搔首問前塵。今向何處去。

和宋僧守詮韻

日暮塵緣寂。信步且歸寺。戴月度深林。清影隨雙屨。此境何空明。遊行任來去。

述懷柬載山儲侯文厚

年來投筆事從戎。萬里飄零途路窮。身到軍門思試馬。心飛故國欲為鴻。擎杯看劍懷原壯。伏闕陳書氣尚雄。此日酬知成契合。儒生可許奏膚功。

題馮集軒明府雲鵷雲門送別圖

本是儒林傳裏人。廿年忽現宰官身。才華望重絲綸閣。愷悌歌傳洙泗濱。客路清談邀刮目。離亭送遠益傷神。何時再向春風坐。得失文章證舊因。

春詞

重重花外隱妝樓。眉畫春山詎鎖愁。戲撲風前雙蛺蝶。任人頻喚不回頭。

李世賢

從兄字子芬。先高祖元孫。道光乙未舉人。現官兵馬司。

副指揮。兄幼與余同學。頗喜拈韻。而無存稿。中年由大職都門。貧不能自給。兄示近作數首。多淒楚之音。則境遇使然也。

華嚴寺夜坐

莫思愁裏事。怕惹衆愁來。煤麝熏人醉。鎗花媚客開。月高涵佛閣。霜重溼經臺。誰解天涯苦。綿衣尙未裁。

秋夜聞笛

殘星疏淡雁行欹。何處笛聲入破吹。珠箔月明初上候。羅幃秋夢半醒時。梅花曲豔聽三弄。楊柳歌悽唱一枝。料得玉關今夜裏。有人惆悵數歸期。

雁字 以征鴻爲韻

幾行鴻雁起南征。筆陣依稀篆太清。遵渚飛來沙印爪。漸遶飄去塔題名。墨池過影渾無迹。紫塞傳書若有情。遙憶衡陽秋浦外。江樓佳句寫縱橫。

江涵秋影認歸鴻。鳥迹差池入望中。作勢行行真寫意。爲誰咄咄類書空。換來鷺羽黃庭就。題過鵲橋碧落通。載酒元亭人在否。好將奇字問蒼穹。

冬暮感懷

六街柝靜夜沈沈。往事回頭子細尋。薄命真輪碾後紙。棄材竊

北爨餘琴。三條華燭忙如昨。一領青衫冷到今。又值天寒兼歲暮。孤蹤淹滯古禪林。

辛酉除夕

年華屈指一番新。臘鼓喧闐又報春。八載歲除都作客。四時節序太催人。今宵欸友情逾密。旅夢還家景倍真。我亦隨僧學拜佛。如山之壽祝嚴親。

華嚴寺春夜聽雨

京華飄泊又殘春。古刹叢林最結因。六載都門盡寓蘭若料得家園風雨夜。也應念著遠遊人。

武定詩續鈔

卷二十三

庚

蕭蕭偏值送春時。添得新寒到被池。無地無時非別感。卻從何處說相思。

風雨連宵客舍空。溼雲如墨壓簾櫳。明朝曲徑通幽處。忙煞僧人掃落紅。

武定詩續鈔卷二十四

李佐賢

字仲敏號竹朋道光乙未進士由編修官汀州知府著

石泉書屋類稿古泉匯書畫傳真

張翼南曰道光戊子

第一人領鄉薦乙未會試與余同榜由庶常授編修充

國史館纂修總纂文淵閣校理道光甲辰會試同

考官恩科江西鄉試副考官簡任汀州府知府在

任六年引疾歸里君之在詞館也兩司文柄所取多知

名士其在臨汀也政蹟余難備知然聞君告歸後就養

都門汀郡公車曹勵成等至都者多造寓問訊起居君

武定詩續鈔

卷二十四

利津 張 銓翼南選訂

李佐賢竹朋編次

嫡配張恭人歿於都門伊等復設公祭送於通衢逮後
主講濟南書院汀郡鄭仰虞等數人應試出都道經歷
下復相率來謁蓋距君之去任已十餘載矣而汀人之
眷眷如此不可見君之感人者深耶其辭官也天府方
深引重擬調漳郡又擬調福州首郡君皆辭不就惟念
先望傍濟河之濱被水冲齧急需遷葬遂決意辭退歸
里後遷葬畢而令嗣貽良已於丙辰歲進士君曰事
君報國未竟之業俟諸後人可矣遂不出君選武定
詩續鈔既成屬余代選家集余並取
君詩選存若干首為誌其梗概如此

陽朔道中看山作

讀書讀蒙莊。愈味愈深奧。看山到陽朔。誰能窮其妙。我從灘江
來。嵐光浮短樞。靈境頓非常。聞得舟人報。萬笏齊插天。無理但
取鬧。疑睇各逞奇。一一殊形貌。高者旋螺紋。卑者披絮帽。僂僂

俯似恭。昂藏形類傲。爭長復爭雄。後擁亦前導。無峯不秀拔。無
筆不通峭。邱壑太支離。縱畫安能肖。我本嗜烟霞。逢山無不好。
況遇此靈山。迥非意料。口噤不能言。情怡常欲笑。無路可登
攀。所憾不能到。安得躋層巔。快哉舒遠眺。更擬效孫登。臨風一
長嘯。

述懷

終軍年弱冠。慷慨志請纓。我亦被此誤。擾擾事浮名。今是覺昨
非。何事苦羈縈。長天自浩蕩。流水淺復清。遊心無窒礙。遂與化
機行。所以居城市。不聞車馬聲。一卷南華經。攜來窗下評。晝靜

悄無語。幽鳥時一鳴。徘徊庭戶外。好風忽相迎。此境無人見。落日挂松棚。空外晴絲墜。宛轉若爲情。作濠濮上觀。何地不空明。倦倚檻下坐。聊復學長生。

立秋日作

猶憶送秋歸。悵望一何遠。忽如遠行客。報自異鄉返。問秋何方來。曾不知其處。安得常延留。無來亦無去。

宿花亭

茅亭何所有。月影篩花影。夜深花睡去。問誰能喚醒。

重遊西湖

疇曩過西湖。簡書相迫促。無詩記雅遊。去去何太速。山靈如有知。毋乃笑人俗。今來脫塵網。去官遂初服。拌將物外身。更與清景逐。春水漾晴波。雙槳來往熟。印月指潭三。桐柳鎖橋六。處士緬遺蹤。爲訪孤山麓。放鶴幾時還。古梅但繞屋。聖因與淨慈。禪房深花木。紅藥未翻階。玉蘭正芬馥。胭脂上海棠。紅妝雨新沐。韶景共流連。伊誰夜秉燭。更逢金石僧。謂六舟開士禪關媚幽獨。碑版投瓊瑤。琳瑯展玉軸。話舊當參禪。形骸忘拘束。回首忽夕陽。遙見雷峯禿。歸來憶清遊。夢境猶轉轂。凌晨出郭門。試把前遊續。肩輿入烟蘿。行行曲徑曲。靈隱古刹開。松風聞謖謖。小憩冷

正字詩集金
三
泉亭危崖挂飛瀑。幽澗咽泉聲。清冷不可掬。何處望朝光。一徑
入修竹。撥霧並穿雲。照我鬚眉綠。啟戶對之江。潮來豁遠矚。氣
象俯萬千。山重更水複。茲遊似溫書。不厭百回讀。更如參妙繪。
展卷幾往復。猶憶虎跑泉。昔年曾寄躡。惟憾徧遊難。里安與天
竺。何當裹餼糧。入山恣信宿。轉念此浮生。底事求饜欲。譬如異
味嘗。豈必期果腹。鴻瓜印雪泥。留此亦已足。

重陽擬登盤山先期出都有作

城居苦囂塵。出郭頓清曠。健翮脫樊籠。野性遂疏放。況爲尋名
山。未至神先王。山意如迎客。參差開屏幃。行行入烟蘿。步步拜

嘉賦。九日顧祠中。高會情歡暢。

同人於九日
在顧祠雅集

酒筵紛羅列。詩句

迭酬唱。插萸少一人。青山獨相向。落帽層巒巔。振衣千仞上。星
辰高可捫。燕冀俯在望。縱目更舒懷。如文空理障。歸日語同人。
茲遊何多讓。

簡何子貞紹基朱伯韓琦兩同年

好詩與好官。勢難兩兼之。譬如魚熊掌。取舍當自知。妙語傳甌
北。去官攻詩詞。官高詎不愛。愛莫重於詩。我今挂冠日。正是高
吟時。身閒無好句。未免太誇癡。峩眉瓦屋草。子貞詩稿眉山今在茲。
來鶴山房稿。伯韓有來鶴山房稿風格杜陵遺。子貞與伯韓。儒雅皆吾師。

攻詩兼勗我。臭味無差池。我昔年弱冠。制藝費研思。三十步芸館。奏賦獻彤墀。篇章循行墨。韻語摘瑕疵。况兼金石好。旁及竹與絲。肄書並讀書。習射復彈棋。泛鶩竟無成。雖多亦奚爲。四出典郡簿。書日紛披。退食偶嘯詠。違計敲與推。行年逾半百。歲月如奔馳。學詩苦不早。勵志已嫌遲。白駒雖已逝。猶冀來可追。蹉跎不努力。空負師友資。兩君主風雅。壇坫相對持。左右與周旋。囊鞬將屬誰。樹幟謝不敏。執鞭亦奚辭。

重到濟南書院書事

講社舊遊地。一別忽經年。重來春已暮。花下解征鞍。渾似堂前

燕。又逐春風還。剝啄啟門扃。蒼苔一徑穿。蠨蛸猶在戶。蛛網綺疏懸。呼童爲灑掃。十斛俗塵蠲。延風敞北牖。疊石對南山。置几供吟誦。移榻備高眠。經營殊草草。生計足青氈。食飽晝無事。緩步庭除前。海棠花已謝。棠棣花猶妍。古槐蔭屋角。新筍出牆顛。拂蘚坐磐石。掬水弄清漣。幽禽如識我。睨眄好音傳。遊魚如識我。撥刺出潛淵。忘機相與適。物各暢其天。去歲中秋日。三五月初圓。軍書風鶴警。城郭隱烽烟。寇至何驚擾。寇退復安全。人事甯足恃。或邀蒼穹憐。此後皆天幸。何弗隨遇安。神遊偕莊叟。更讀逍遙篇。

自龍洞至佛峪記遊三首

歷下名山多。東南山更好。數載已神遊。嚮往輒傾倒。今歲靖烽
烟。謝絕塵氛擾。同志揚子雲。楊坦夫茂才同遊結件事幽討。策蹇出郭
門。曦光破清曉。節候近重陽。卻無風雨攪。秋色正清華。樵徑尋
窈窕。嵐光撲面來。空翠浮飄渺。入山猶未深。貺我已不少。

行行過山椒。犖确不容足。泉水出山清。琤琮嗽鳴玉。渡澗更通
幽。山多不厭複。陡起三峯高。渾疑巫峽束。畫木寫倪黃。淺絳間
濃綠。石塔戴崔嵬。龍祠枕山麓。古木圍蕭森。巖菊綴芬馥。錦屏
曉宜春。祠前開障名錦屏春曉秋色偏娛目。依舊在塵寰。頓覺氣清淑。小

憩尋巖洞。一徑繚而曲。山僧導我前。白晝卻秉燭。非關入公門。
到此躬已鞠。笑比羊在藩。轉身防抵觸。靈境頓豁辱。聳立忘跨
蹠。回望迷洞口。已入山之腹。圓竅石鐘懸。崇崖覆夏屋。邃古穴
居時。何人此寄躅。仰瞻不可極。聞聲飛蝙蝠。別竇窺陰森。恐有
螫虺蝮。出洞攝巖腰。蒼然豁遠矚。攀蘿下石磴。綠蟻相追逐。聞
道五龍潭。更歷幾崖谷。遊興未闌珊。足疲憚往復。落照已銜山。
姑就僧寮宿。

晨起續清遊。佛峪五里許。來路記三叉。地僻無行旅。石徑倍嶽
崎。提攜呼伴侶。峭壁立千尋。紅葉明朝旭。高下雜丹黃。都將罽

武定詩集卷之六
六
隙補憶昨龍洞遊。霜楓聚三五。輪此萬樹紅。彌望不可數。縱倚
荆與關。紛本難摹撫。更喜懸崖上。托根無寸土。終古斷樵蹤。誰
能縱尋斧。隱隱吠犬聲。林幽藏寺古。雲梯快其登。厯階更接武。
危厂撐虛空。巖坳託梵宇。巧借石作天。何勞費砥柱。佛像劇莊
嚴。跌坐無一語。對面敞虛廊。羣峯盡當戶。靜境忘朝昏。雲烟自
吞吐。西接香積廚。泉清茗可煮。東轟釣臺高。登臺餘勇賈。何處
殷雷車。飛瀑如飛雨。深澗激清湍。未許釣魴鱖。舉首近青天。下
瞰衆山俯。攬勝宿願償。渾忘登頓苦。歸去憶遊蹤。夢繞白雲鳴。

雜詠十首鈔八

天開與地闢。云自混沌起。未識混沌先。何以肇其始。天崇與地
卑。見慣渾不怪。未識此字外。更有何境界。少時勞追想。人笑太
論癡。老我復滋惑。不異髫齡時。方知人在世。譬彼魚在池。水外
魚不見。字外人豈知。神聖與庸愚。同囿此乾坤。但知六合內。外
此誰能論。

大化夫如何。渾淪包無外。於物苟區分。已違彼蒼意。善惡用彰
輝。邪正剖義利。上下辨尊卑。人物殊賤貴。偉哉聖人功。萬世民
攸賴。豈知造物仁。一視無同異。巨壑混魚龍。芝蘭出蒿艾。虎豹
與祥麟。並育不相害。丹鳳與鴟鴞。各自鳴天籟。胡弗判去留。別

開清淨界。成化本無心。有容德乃大。人憾不能無。所以爲天地。
今歲苦嚴寒。積雪不可埽。我謂此寒威。已盡殘冬杪。貞下定起
元。預卜春回早。宇宙此陰陽。二氣如環繞。消長互乘除。對待無
多少。寒往卽暑來。昏暮轉向曉。誰會度長夜。自酉更逾卯。天運
自有常。人事何須巧。富貴與賤貧。代謝亦草草。位高而多金。問
誰能常保。不朽古有三。榮名以爲寶。

福善與禍淫。只論理常然。豈知逢其變。數定理無權。下元際運
會。兵戈自年年。所過城與市。殲滅無人烟。若云屬惡報。豈無一
善人。曷弗別良莠。玉與石俱焚。兵燹不到處。詎必無頑民。胡弗

竭澤漁。轉多漏網鱗。搔首向天問。天高語不聞。清風爲掃蕩。浩
劫成灰塵。善惡有感應。施報不能紊。苦心救世語。不得不云云。
鴻鈞鼓大力。細微詎剖分。試語爲善者。責報莫紛紛。

養民井田法。只宜行上古。古法用今時。所患無曠土。一夫田百
畝。安得田如許。縱授餘夫田。亦恐缺難補。變古開阡陌。何必咎
嬴秦。聖人卽再作。古制豈能遵。天地德好生。羣黎日益廣。熙來
攘往儔。如蚓食黃壤。土地闕無餘。後生資何養。更歷數千年。何
堪一設想。一笑問坤維。何不隨時長。

馳逐名利場。比例魚貪餌。代不異古今。人無區賤貴。寡欲乃清

心多營必多累。然使盡屏除。塵世亦寡味。畢竟此兩端。高下有
等次。爲富必不仁。顧名或思義。懷惠兼懷土。喻利小人事。沒世
疾無稱。不失君子意。甯儉勿用奢。好名猶勝利。

論事有是非。論人多毀譽。毀譽固難憑。是非亦鮮據。君子無所
爭。豈盡物無忤。理有難通時。遭遇聽乎數。俯仰不愧忤。綽然有
餘裕。所以橫逆來。逢之不必怒。貧賤不以道。得之不必去。
美人無定姿。佳文無定格。誰知鼓瑟者。別有膠柱客。聲調工揣
摩。如歌按節拍。字句較短長。如匠陳繩墨。真意已銷亡。貌似神
理隔。優孟縱衣冠。聲情詎能得。雷霆互發聲。雲霞屢變色。陵谷

有遷移。滄桑異今昔。天地大文章。終古無成迹。黃土搏人後。未
聞別形模。何以千萬億。各具一頭顱。陽虎類孔子。織毫豈無殊。
此外相肖者。不聞有一夫。方知造物巧。詎止萬變圖。文心從此
悟。今吾非故吾。笑爾鈍根人。依樣畫葫蘆。

聞客談海市歌以紀之

放眼頓覺九州隘。遊戲超出紅塵界。靈境時現東海東。誰譎不
顧人。驚怪有客天涯汗漫遊。足踏蓬萊閣上頭。天風海濤相颺
颺。豪情逸興凌滄洲。銀海眩生失溟海。但見珠簾畫棟飄渺之
飛樓。仙居臺觀凌雲起。神工鬼斧一時修。不然汪洋浩瀚萬頃

流誰取廣寒宮中八萬二千戶。擲向波面相沈浮。況復變滅無名狀。換羽移宮別一樣。魚龍曼衍早安排。十光五色紛迷望。有時蚩尤噴妖霧。涿鹿野戰神兵布。劍戟林立雪花明。鐵騎馳突無回顧。有時王母下瑤池。琅瑯彷彿聞韶籥。神光離合乍陰陽。雲旗風馬羣靈護。有時強暴過嬴秦。凌空築起長城固。有時亥市趁夕陽。珊瑚木難炫無數。女媧七十二變變無窮。驚倒世人不得知其故。初疑滄海變桑田。紅塵劫灰理或然。不待精衛銜石填。居然雕牆峻宇相鉤連。又疑神仙恣遊戲。畫稿粉本偶寫意。借得蔚藍當紙鋪。丹青揮灑閒情寄。歸來向我述異聞。目極

浩渺胸生雲。我遊未到已神往。蜃樓海市何紛紜。宇內奇觀見始好。奮飛擬赴蓬壺島。勝境難逢可奈何。癡心欲效坡仙禱。更擬乘槎一登攀。驂鸞跨鶴謝人間。色相誰知都是幻。可望不可卽。如三神山。從知天地浮漚耳。來今去古東流駛。一會一十二萬年。忽忽過眼只如此。嗚呼過眼只如此。我欲問天書一紙。

題彭詠莪同年蘊章樞垣趨直圖

殿瓦凝霜階浸月。天上疏星半明滅。樞院深沈魚鑰開。侍臣五夜趨金闕。畫圖開卷索題詩。春明舊夢堪回思。藥榜名忝附驥尾。紅綾宴罷看花時。掌握絲綸十二年。輸君先著祖生鞭。黃

扉接武星辰近。丹詔恩多雨露偏。待漏披衣天未曉。鳴珂聲
靜趨直早。夙夜誰知匪懈心。傳神繪出丹青好。輜軒今過仙霞
路。珊瑚都化桃李樹。歡然道故又逢君。舊時真面留紈素。老眼
摩挲子細看。還將心事語同官。手攜玉尺來聞海。宵夢猶牽玉
宇寒。我聞此語憶疇曩。振觸西清鈴索響。待從香案幾經年。
金華殿上勞追想。汀水南流雁北飛。何時重許鑿坡上。

汀郡試院雙古柏歌

古柏在郡城考院有樹神廟籤語靈應汀人曰順治初
年唐王兵敗退守汀城城尋破有從臣二人同殉節於

樹下此廟蓋忠魂所憑依也因憶紀文達五種筆記載
郡試時見兩神人緋袍立樹上特懸一聯於廟云參天
黛色常如此點首朱衣合是君蓋未聞雙忠事故云爾
今作歌正之而仍惜雙忠之名姓不傳也

古柏未識何年種。團團雙蓋垂雲重。亭亭老幹薄青霄。虬枝應
許棲鸞鳳。風霜飽歷質堅貞。棟梁材大誰能用。托根試院傍文
星。廟貌尊嚴香火供。初疑巫祝惑人聽。靈籤底事多奇中。汀人
道此非偶然。軼事曾稽順治年。唐王退守彈丸破。雙忠並縊雙
柏前。雙柏雙忠同不朽。卻憐名姓今無傳。南疆紀畧留青史。葵

源道上石齋苑。賴垓熊緯胡上琛。從王殉節堪僕指。而今靈爽得憑依。忠魂是否三君子。二百年後感滄桑。蒼茫弔古情何已。河間詩客來此都。神光隱現拖霞裾。採風車過弗深考。朱衣揣測毋乃誣。吁嗟乎人千古樹兩株。我來樹下三踟躕。如此勁節封爵無。終勝秦松呼大夫。

胡麻嶺看雲海

胡麻嶺俗名虎蟒嶺。余爲更易今名。因公赴連城過嶺最高處。時值新霽。嶺下晴雲平鋪似水。雲端露出遙峯數十點。濃青搖漾。頓成奇觀。詩以紀之。

胡麻嶺上空復空。浩浩蕩蕩乘天風。聳身咫尺重霄近。一輪晴日磨青銅。俯看大地形容改。不知井邑今安在。茫茫一片但平鋪。信有桑田變滄海。虛白上映蔚藍天。天容雲氣相澄鮮。因風搖漾波瀾闊。中流但少乘槎鷺。羣山滅頂不肯讓。衝波亂刺千峯尖。金焦江口浮兩點。蓬壺方丈只三山。何如一氣混茫裏。峯巒無數海無邊。仙霞嶺出青雲上。茲山並峙何多讓。黃山雲海人豔稱。此間雲海無傳名。天荒地僻人蹤少。湮沒應作不平鳴。憑高搔首將天問。題詩一洩山靈忿。山靈轉笑人何癡。嵐光雲影自娛嬉。天空海濶兩相忘。那計人間知不知。

崇效寺看牡丹

長安城中花事新。花時多少看花人。姚黃魏紫矜標格。天香國色嬌陽春。傾城士女紛絡繹。金鞵玉勒霏香塵。詩人墨客工題詠。豪華競進羅庖珍。花情人意屬杯酒。頽然醉臥藉芳茵。城隅西偏崇效寺。梵宮幽僻少人至。逢春都爲賞花來。遊人更比蝶蜂恣。春雨春風取次過。競言此地爭春多。祝花好化恒春樹。留春不住如春何。朝朝暮暮韶光老。狼籍殘紅不可埽。門前冷落車馬稀。用香山句門內離離生蔓草。吁嗟乎牡丹花開富貴圖。牡丹花謝只須臾。伊誰過問松與竹。青青終古無榮枯。

唐花

北地朔風吹栗烈。不見飛花見飛雪。誰信人工奪化工。唐花烘出殘冬月。蠟梅低亞紅梅枝。海棠的皪兼垂絲。玉蘭芬馥辛夷笑。牡丹富貴傾城姿。更有千紅與萬紫。芳菲詎讓三春時。長安市上斜街前。鈿車寶馬來喧闐。鎮日買花如買笑。紛紛拋擲青蚨錢。紅鑪暖閣花姿益。位置金屋藏嬌妍。誰知別有看花客。對花無語翻長歎。歎人豔說花開早。花開花謝殊草草。不隨桃李嫁東風。未到荼蘼花已了。矯揉物性失天真。繁華能得幾時好。物待栽培人待時。助長何須誇智巧。

題茅菘睦明湖泛月圖

明湖一片空明境。風露三更月千頃。桂魄團團香氣濃。蓮花綽
 約明妝靚。拍浮疑作廣寒遊。蘭橈盪破玻璃影。詩情浩蕩酒懷
 寬。圖畫風光入孤艇。疇曩應試賢良科。扁舟載月中秋過。戊子秋試
 後會泛湖作。青衫一領託烟波。靈藥直欲乞嫦娥。明星耿耿轉
 竟夜之遊。銀河扣舷乘興猶高歌。卅年舊事春夢婆。而今贏得雙鬢皤。題
 君此畫三歎息。及時不樂當如何。

王子梅大令鴻屬題春明六客圖

圖中孔繡山中翰。朝鮮李藕船樞使。及繪圖之吳冠英。

皆屬余舊雨也。披覽再四。不禁離羣之感。因題卅句。以
 當懷人之什。不覺其言之長也。

蒼松謾謾清風生。怪石古木紛交橫。六客列坐如列宿。五星聯
 貫間客星。瑯琊詩人逢歷下。鵲華橋畔尋鷗盟。裏出圖卷索題
 句。振觸舊夢遊春明。風流跌宕孔文舉。詩壇酒社招賓朋。韓齋
 雅集互酬唱。投李時報玖與瓊。瀛洲海客乘槎到。燕臺會合蹤
 如萍。天涯海角聯臭味。相求同氣應同聲。六客訂交得其半。翰
 墨結契緣匪輕。作畫者誰吳道子。談藝亦復襟懷傾。詩囊畫卷
 迭賓主。秋月春花倒醪醕。別後琴樽頓消歇。而今湖海各飄零。

鱗鴻迢遞音書斷。屋梁落月離緒縈。明湖蒹葭隔秋水。伊人河
溯空復情。詎意披圖如把袂。傳神畢現鬚眉清。北望燕雲東望
海。何年風雨重挑燈。

李烈婦

同治紀元二年春。歲癸亥月丙辰。婺星光墮濟水濱。李氏子孚
先名利津。籍一書生玉樓遽。赴修文詔。烈婦志比金石貞。上無
菽水可承歡。下無繞砌芝與蘭。感歎寡鵠悲離鸞。徬徨中夜摧
腸肝。成仁志決須臾耳。熟計偷生不如死。雉經梁上自投環。願
從地下隨夫子。噫嘻乎志士多烈士少。貞烈誰知屬窈窕。信有

疾風標勁草。婦伊誰氏屬。張與李子生同鄉。官吏入告請旌揚。
天章褒寵閭里光。我屬舊史職文章。書爾姓氏千秋芳。

顧祠聽雨圖王子梅大令屬題

曩在都門。每歲與顧祠雅會。今別來屢更歲。瑄矣披圖
振觸前遊。不勝今昔之感。

雨勢噴薄雲模糊。淋漓水墨一紙鋪。詩情畫意雨奇絕。寫來併
作聽雨圖。顧祠近依慈仁寺。亭林先生芳躅寄。春秋俎豆報馨
香。我亦屢交堂戶事。一番雅會一題名。會記塗鴉留姓字。餘事
文譙聚賓朋。雄辯高談各樹幟。縱橫上下三千年。豈徒博物誇

多識舊遊一夢幾經秋。瑯琊詩人圖畫留。披圖鄭重回環讀。萬
感觸緒紛交投。聞道年時亂兵擾。冷落祠堂餘蔓草。雙松依舊
蔭階除。未識何人薦蘋藻。文舉石林俱痛傷。孔繡山閣讀何堪
笛韻聽山陽。壽陽愁遣老相國。世丈歸然魯殿存靈光。鬱鬱
幽懷向誰託。舊雨今雨都離索。舉頭日近長安遠。奮飛難跨雲
中鶴。吁嗟乎。明湖水清復清。狎迹蘆中鷗鷺盟。今夕與君重
聽雨。一樽魯酒話春明。況值烽烟連海內。何時文譙樂昇平。蒼
茫身世一俯仰。古抱今懷何限情。

題王秋垓二尹蒼茫獨立圖

蒼茫獨立出塵表。高瞻遠矚乾坤小。舉頭天外氣昂藏。浩浩落
落詩酒狂。斯人斯境兩奇絕。惟伴清風與明月。高歌一曲知誰
聽。天容澹沲山光青。還君圖畫為君語。並世何人堪伴侶。俯仰
無窮自千古。

新樂府 弁序 鈔十

昔白傅作新樂府序曰。其辭質而徑。欲見之者易喻也。
其言直而切。欲聞之者深戒也。其事覈而實。使采之者
傳信也。為君為臣為民為事為物而作。不為文而作也。
余何人斯。詎堪妄希前賢。然觸時感事。古今人有不同。

而同者。因即見聞所及。掇拾成篇。得十二首。意雖激而非妄。詞雖俚而非虛。庶幾言者無罪。聞者足戒。無背於風人之旨焉。閤之者。儻以為芻蕘可採。或於時事有補於萬一。斯則區區愚衷所深望也。若以為誹謗。則吾豈敢。

貼膳黃

貼膳黃頌吾皇。皇盛德沛。綸章何地偏災。逢水旱。緩征蠲稅恤農桑。深仁厚澤沐。恩施可惜小民難預知。奏入彤庭如望歲。捧來恩詔卜何時。縱教實惠逮閭閻。閭閻

民困已堪憐。況有貪吏君知否。暴斂急徵先入手。膳黃貼向通衢口。田賦已完十八九。

官兵來

賊寇來民告哀。官兵來民救災。賊寇過民家破。官兵過民應樂。問民民但淚珠傾。既苦寇更苦兵。寇致汝死。兵汝生。緣何疾痛無異情。民言兵寇難分別。此苦自喻。逢誰說。寇如狼兵如虎。狼貪猶或跋其胡。虎猛誰敢與鬪武。倉箱告竭。杼軸空。與之庾與之釜。猶未饜足。恣搜取。奪我衣不復能曳。妻奪我食不復有儲。精寇來取精。或遺麤。兵災過處無完土。況復劫掠更姦淫。飲恨

不敢告官府。縱告官府亦何補。我聞此語心如焚。太息兵寇竟難分。究未縱火未殺人。擬兵於寇非其倫。勸爾切莫怨官軍。怨語恐被官吏聞。

募鄉勇

募鄉勇助官兵。官兵按籍多空名。養兵數羸用兵絀。募勇聊以壯軍聲。軍聲雖壯虛糜帑金多。可暫不可久。餉匱將如何。招之卽來遣不散。安置無術翻爲亂。來則爲兵去爲寇。紛紛聚散如鳥獸。可憐盡屬無業民。飢寒迫切誰能救。誰能救當謀生。安得良田億萬頃。俾爾盡歸耕。不爲寇亦不爲兵。

報捷音

報捷音人共見。但待時不須戰。何必將軍嫺六韜。何曾天山定三箭。紛紛賊寇如飛蝗。捕蝗無計徒張皇。蝗飛來田苗食盡無根莖。蝗飛去冒功請賞人無數。自來自去孰作梗。馳突如入無人境。此邦奏捷唱凱歌。誰知移禍到鄰省。一騎紅塵又告警。

黃流決

黃流決黃流決。建瓴之勢直傾瀉。往歲江南今山左。江南修防帑金多。山左無工呼奈何。聖朝明詔恤民隱。揀災捍患無偏頗。胡爲政府今殊科。諒由時勢非由他。承平回憶嘉道初。河壩

官吏樂有餘。百千萬億河庫儲。虛糜歲費泥沙如。錦車寶馬馳
通衢。羅綺文繡飄輕裾。酒淮肉陵充庖廚。梨園曲部女樂俱。清
歌妙舞紅氍毹。宴罷夜永添紅燭。千金一擲狂呼盧。昔何樂今
何苦。帑藏告罄難攜取。黃流東下誰能杜。田廬城郭感滄桑。哀
鴻遍野魚生釜。河入濟濟入海。湯湯汨汨十餘載。昏墊不異洪
荒時。離居蕩析何所之。溺猶已溺詎不思。拯溺無術將安施。當
年儻肯受以節。禦患何致今無資。職其咎者當屬誰。嗚乎我歌
當哭。君休怪。言者無罪聞足戒。

埧地糧

埧地糧徧四鄉。黃流過處水湯湯。兩岸崩壞如頽牆。須臾千丈
萬丈長。繡陌綺阡化澤國。空糧仍納困輸將。民負財盡訴官長。
官言田賦例有常。糧名豁除談何易。申文須待咨部堂。咨部堂
無時日。歲歲征輸竭民力。大戶稱貸猶有所。茅屋雖破牽蘿補。
小戶追呼何太苦。賣兒鬻女償官府。盛朝屢 詔恤下民。地
埧肯使糧猶存。可憐民隱 天不聞。願告直言賢御史。速將下
情上達 聖天子。

海商舶

海門東下黃流奔。門外商舶如雲屯。舶中商賈語切切。語罷忍

淚聲暗吞。問爾經商遠到此。不歌而哭胡爲爾。答言泛海歲一
至。涉險只爲蠅頭利。征其鉅舍其細。當年關稅有常例。常例無
妨歲歲來。誰知今歲增權稅。增權稅增數倍。欲留權算盡錙銖。
欲去往還數千里。進退維谷羊觸藩。嗟嗟商賈誠何罪。旣開船
商哭。又聞關吏喜。喜稅益多多。入官兼肥已。關吏何足論。官亦
疾苦如不聞。腴民脂膏媚大府。反膺上考嘉其勤。吁嗟乎斯人
豈其未讀書。胡不聞與其有聚斂之臣乎。

焚桃源

高山之高高極天。巒峯環繞成墉垣。中有膏腴千頃田。微通一

徑如桃源。有客結廬山之巔。自稱學佛兼學仙。道統直接千秋
傳。三教源流都匯此。到此長生盡免死。羣愚蠢惑來紛紛。官幕
商賈及遊民。輦入金帛翻賈禍。先幾見遠無其人。人人祇道藏
身固。誰知生死難逃數。一朝壓境來官軍。薄言往愬逢彼怒。逢
彼怒。策傾覆。虎視眈眈欲逐逐。片時殺戮靡孑遺。擄掠囊橐都
罄足。聲鎖淚盡不聞哭。伏尸狼藉填陵谷。彷彿驪山一炬焚。焚
時不辨石與玉。軍士言誅逆叛。安能一一良莠判。民言入桃源。
初意思避亂。誰知避亂翻逢難。有何罪不可追。不爭不鬪不抗
違。竟同叛逆一例看。旁觀側目呼奇冤。千秋誰斷此疑案。嗚呼

正定詩續金
千秋誰斷此疑案

兵戈戲

兵戈戲。兵戈戲。歌舞場爲爭戰地。爲鵝爲鶴陣圖開。大戟長槍。逞利器。龍爭虎鬪鯨鯢吞。但誇有勇不尙義。喧闐金鼓震雷驚。斬將搵旗人辟易。黃童白叟並黎民。觀者如堵盡得意。上自都門下村寨。司空見慣都不怪。我來觀劇三歎息。歎息人心風俗壞。登場歌舞歡喜緣。兵凶戰危人所戒。喜樂憂危風馬牛。胡爲混同無分界。況今烽火徧郊野。驚聞風鶴來戎馬。斬免鋒鏑幸偷生。刀兵爲戲胡爲者。觀劇惟願先止戈。何妨後舞復前歌。庶

幾春臺共樂人民和

鳳巢高

鳳巢高。鵲巢低。維鵲何堪比鳳兮。鵲飛乘風便。高或與雲齊。鳳巢不到阿閣上。一枝轉不厭卑棲。高卑貴賤各有宜。造化底事顛倒之。顛倒有意或無意。文章變化方離奇。君不見馬行山下。上有田馬若在淵。牛在天。又不見山下有松山。上苗徑寸莖。蔭百尺條。吁嗟世事多如此。不平之鳴胡爲爾。

江行晚眺

風急孤帆飽。春江正落暉。驚濤驅岸走。遠岫挾雲飛。客路輕千

里。暝烟合四圍。故鄉天際望。搔首更依依。

青駝道中早發

催起征人早。荒村已唱雞。殘星臨野大。溼霧壓山低。夢影車中續。秋痕陌上迷。卻餘詩興在。小住更留題。

劍河晚泊

峽束河流疾。蒼茫赴海門。孤舟穿箭駛。亂石逐濤奔。沙岸明於鏡。山城小似村。渡頭爭晚泊。人語聒黃昏。

舟中曉望

驚起蓬窗夢。篙聲響亂灘。雲垂榕樹碧。山映荔支丹。不減乘槎

興。詎言行路難。詩懷添壯濶。望入海門寬。

山程早發

驛路千山裏。登程夜已分。雞聲迷店月。鶴夢冷巢雲。過雨涼先透。流泉細轉聞。渾忘行役苦。此境隔塵氛。

渡揚子江

不盡長江水。蒼茫萬古流。金焦如對待。天地共沈浮。遊子雙蓬鬢。孤帆一葉舟。篷窗高挂起。目極海門秋。

秋夜

碧天涼似洗。不受片雲封。近月星芒斂。無風露氣濃。花陰移上

正定詩續金
壁樹影臥成峯。坐久渾忘寐。難尋化蝶蹤。

自遣

浮生頓悔逐輪蹄。茅屋棲遲小院西。一半點苔沿砌長。兩三竿竹壓檐低。無人過處花自落。有夢回時鳥乍啼。瀟灑天懷活潑地。塵寰盡是武陵谿。

春燕

烏衣悵別已經秋。又趁韶華故國遊。柳絮香泥融紫陌。梨花深院鎖紅樓。新巢欲向雕梁認。舊迹應將綵綫留。卻笑年年拋玉翦。何曾翦得斷春愁。

步于芬兄詠菊元韻

三秋花事怕收場。看到黃花興轉狂。冷淡幾曾招熱客。孤高未屑伍羣芳。能留晚節何妨傲。別抱幽情不在香。料得時人難共賞。移樽獨對小籬傍。

登岱

天風吹袂落峯頭。蒼莽寰瀛入望收。日月雙丸捫上界。雲烟九點小齊州。虬龍已化秦松古。碑碣難尋漢時留。試問登封七十二。可能金石壽千秋。

送春

正定詩續金
彈指韶光過眼輕。驪歌怕奏一聲聲。何人折柳還留別，滿地飛花欲送行。紅豆者番增懊惱，綠蕪前路不分明。斜陽流水銷魂處，玉粲登樓無限情。

修史偶成

頻年芸館任優遊，青史殊慚秉筆修。似我可能增一傳，論人早已定千秋。是非難遁虛堂鏡，成敗真同大海漚。經濟文章兼節義，伊誰徼倖姓名留。

山行書所見

峭壁危峯劍水西，灌林叢莽怪禽啼。荒程驛舍空餘瓦，破廟神

軀半墜泥。石磴縈紆皴似帶，山田重疊界成梯。分明一幅倪黃畫，留待詩人細品題。

山行遣興

一派清音勝管絃，沿谿鎮日聽流泉。亂山滕薛互爭長，野卉尹邢相鬪妍。宦況依稀中酒味，吟懷澹沲早秋天。輕裝頓覺歸來重，添載新詩又幾篇。

自出守辭京不獲侍，朝者十載於茲矣。丙辰春因男

長

恭應 殿試重至 宮門感賦

當年奏賦獻明光，侍從叨陪鶴鷺行。聖訓珠璣天語重，

恩頒餽餌。御廚香鼎湖。瞻望成千古。汀水滌涸限一方。此日宮門重接武。難禁涕淚憶先皇。

登盤山絕頂挂月峯小憩雲罩寺

亂石縱橫路不分。千盤轉上走螺紋。峯高疑挂中天月。松老猶藏太古雲。畿輔拱朝龍氣壯。晴空嘹唳雁聲聞。登臨憑眺情何限。回首西山日易曛。

陶然亭遠眺

迴立孤亭不結鄰。登臨覽勝隔紅塵。壁間詩句留題客。郭外山光入座賓。楊柳春風誰繫馬。蒹葭秋水正懷人。憑高徒倚雕欄

望萬戶祥烟護。紫宸。

書小倉山房集後

空諸依傍自成家。未必無名豈漫誇。集有未必全無後世名之句萬頃波瀾

真有筆。一生情好不離花。官輕詎信塵能網。詩好何妨玉點瑕。爲語蚍蜉休撼樹。伊誰曾具此才華。

古厯亭讌集感懷

厯亭離別幾經年。鴻爪重來話舊緣。湖影輕搖紈扇底。山光遙落酒樽前。茫茫大地連烽火。隱隱官城沸管絃。愁緒萬千姑放卻。且拌沈醉水雲邊。

遣懷 鈔二

堂堂春去惜年華。感歎勞生未有涯。愛畫何妨如好色。編詩敢
詡已名家。頻栽碧玉淇園竹。學種青門邵圃瓜。贏得身心無箇
事。駐顏應不借丹沙。

幽懷淡似伯牙琴。非遇鍾期孰賞音。涉世難消名士氣。讀書真
見古人心。公然無累辭官早。未免偷閒得趣深。若向千秋論事
業。誰言鐘鼎勝山林。

靜坐

水雲深處結緣深。淨洗塵埃未許侵。明月相尋如踐約。青天在

上自高吟。曹騰夢憶遊仙枕。淡泊情移太古琴。摩詰晚年惟好
靜。早應知我此時心。

有勸余出山者拈此示之

南柯夢醒迹成陳。野鶴閒雲物外身。已是回頭登岸日。羞為攘
臂下車人。收藏簪紱渾忘舊。料理齏鹽且耐貧。自顧封侯無骨
相。名場何必戀風塵。

六十初度自述

荷花爛漫正芳辰。花下稱觴歎此身。樽散棄材難用世。纒安好
夢久成塵。陶情絲竹偏多感。繞座圖書不算貧。卻笑童心猶未

化如何已是杖鄉人。

追維襁褓荷親慈。六十年前墮地時。吉夢虛教誇鳳至。余生時母夢鳳

入懷此生慚未盡烏私。榮封表墓終何補。捧檄還鄉恨已遲。

罔極深恩無日報。開編忍誦蓼莪詩。

丁年橐筆入詞曹。侍從追隨敢憚勞。采殿書成新賦稿。御

鑪香惹舊宮袍。青編修史人爭羨。會供職史館玉尺量才我幸操。甲辰

分校春闈又何意鯁生邀寵遇。濃恩稠疊一時遭。

閩汀典郡幾經年。差喜囊無造孽錢。荔子陰中勤判牘。梅花香

裏課耕田地殊孔道。偏宜嬾居愛名園。不欲遷。署有梅園可資遊覽曾調首郡

力辭不就祇爲洪波淪丙舍。抽帆宦海引歸船。因先塋被水急需遷葬辭官歸里

春明再至黯銷魂。丙辰就養入都往日風流半不存。詞館已行前輩禮。

禁林重認舊巢痕。升沈過眼都陳迹。明弼關心最後昆。男貽良觀

政西清白家風須似續。好承堂構荅君恩。

因緣翰墨樂同羣。歷下臯比講席分。庚申就濟南講席四載生徒頻問

字。一編風雨細論文。窗前種竹時聞籟。院內多竹湖上看花日易曛。

遊倦歸來重鍵戶。衣襟猶帶鵲華雲。

露夕烟朝取次過。田間歲月易消磨。清歌偶聽玉連瑣。薄醉時

傾金叵羅。知已常懷千里遠。故人數到九原多。愁遺天壤猶存

我感舊傷離可奈何

逝水年華墮渺茫。雄心弩末贖文章。慚無濟世經綸展。羨有名山著作藏。鑽紙蠅癡還得味。抽絲蠶老未全僵。邇來泉幣新成譜。時刊古泉張台顧恒陶岳洪遵或頡頏

家餘半畝老菟裘。遣興何須賦遠遊。娛我鶯花時得句。任人麟閣說封侯。偶然魂夢迷蝴蝶。肯為兒孫作馬牛。笑比登樓年少婦。只知歡喜不知愁。

萬卷叢中了此生。塵緣謝盡總無爭。短長任聽人臧否。出處何關世重輕。入夜聞雞羞起舞。臨風唳鶴怕傳聲。今歲賊屢犯東境丹心

報 國依然在。盼切餘年見太平。

明湖卽目

蘋末涼颼動。蓮房冷露稠。一聲新雁起。頓覺滿湖秋。

過瀟湘

清流曲折漾晴波。風送輕帆宛轉過。欲把湘靈消息問。空明一片水雲多。

春夜大風雨

狂飈挾雨撼書樓。有客挑燈樓上頭。已是春愁消不得。更添一半替花愁。

虎邱竹枝詞鈔一
響屨廊前日易斜。當年粉黛憶繁華。吳宮花事今銷歇。贖有山塘喚賣花。

夢回

街鼓沈沈玉漏遲。碧紗窗外月明時。夢回忽見橫斜影。知是梅花第幾枝。

劍河阻風寄內

深閨燈火夜如秋。兒女團團話遠遊。知否延津山下路。連宵風雨泊孤舟。

山行小憩忽聞異香於道旁見幽蘭一叢感賦

草莽叢中茁素蘭。香生鼻觀勝梅檀。往來過客誰青眼。都當榛菅一例看。

傷懷

庭階寂寞獨徘徊。繡戶塵封不忍開。正是傷情無著處。一雙新燕卻飛來。

往事如烟夢不真。幾番回憶倍傷神。深閨依舊青燈夜。只少燈前夜話人。

題腕芳畫蘭遺墨

深閨扶病寫芳蘭。遺墨零星不忍看。羨煞幽香空谷裏。兩叢相
傍永團圓。

明湖權歌鈔二

湖上重來感不禁。當年小住託禪林。依稀舊夢渾難記。一片烟

波何處尋。昔年應試會
寓匯泉寺

綠波楊柳浸樓臺。滉漾玻璃鏡面開。一陣香風聞笑語。藕花深
處畫船來。

贈陳姬儷琴

姬京華女也。予向無妾媵。今老矣。始作枯楊之稊。而姬

有終焉之志。不願效楊枝之放也。故有是贈。

笑他梁燕去來飛。鸚鵡依人意莫違。甘與樂天相伴老。不隨樊
素送春歸。

重遊歷下

遊蹤汗漫落人間。富貴浮雲只等閒。賸有塵緣猶未了。年年來
看鵲華山。

李煜奎

族姪原名貽仁。字復亭。宗山兄姪。咸豐戊午順天鄉試

舉人。姪少余二歲。幼與余同學。弱冠後復受業於余。爲
人醇謹敦篤。好學不倦。乃年近五旬。甫獲鄉薦。未

博一第 遼爾
謝世惜哉

登岱懷古

素抱欲凌雲。今日遂茲志。古道撥烟尋。仄磴攀蘿至。直上歷蠶叢。陡覺觀聽異。賈勇躡層巔。一覽誠快意。衆山何渺渺。羅列兒孫侍。齊魯並淮徐。星羅復棋置。世事感滄桑。古蹟誰曾記。秦皇玉檢文。漢武金泥字。遺烈安在哉。視之如兒戲。千古說登封。史筆修祥瑞。肆志求神仙。神仙杳難致。試登日觀峯。觀海但遙企。安期在何方。子喬難把臂。不如飲美酒。高歌抒所寄。卽此絕頂遊。亦如鵬展翅。恨無謝朓詩。吟成聊自恣。

書齋前杏花早放竹朋叔賦詩敬和元韻

慚無警句上吟壇。枉對韶光倚畫欄。深巷花宜晴後賣。玉樓人向醉中看。羣賢擣藻爭春豔。步韻題箋依樣難。會待採芳開勝宴。追隨杏苑共臚歡。

柳線

萬縷千條望欲迷。柳花飛盡線抽齊。青青莫認河邊草。不送馬蹏繫馬蹏。

牡丹初開被風摧落感賦

何堪回首問繁華。零落雕欄日易斜。卻笑人間矜富貴。誰知富

貴等於花。

夜雨

漏盡鐙殘夜未明。瀟瀟陡覺嫩涼生。閒聽亞字闌干外。可是蕉聲是竹聲。

李貽良

長男字枚卿。咸豐丙辰進士。現官刑部員外。兒輩初學拈韻何足

言詩特未肯阻其嚮學之志。各存數首附於家集以示鼓勵。

代家大人為王少司馬茂蔭題王母方太夫人節孝冊

黃岳鍾靈秀。璇閨懿德彰。髫齡徵敏慧。壺範守矜莊。家計遭中

落。良人別遠方。哀音傳旅雁。嘉耦拆文鴛。總帳風悲咽。泉臺路渺茫。殘軀拌訣絕。閨室痛倉皇。環跪爭祈請。低頭暗忖量。加餐酬姊姒。忍淚慰姑嫜。賸有餘生在。能將大任當。釵鈿辭寶鏡。錦繡出雕箱。豚酒高堂膳。熊丸幼子嘗。填簾金券卻。機杼素絲涼。窀穸靈全妥。勤勞願竟償。廿年貞苦節。一旦發幽光。瑞應蘭階秀。名從藻榜揚。鶴籌添海屋。鸞誥下天闈。位業躋台鼎。才猷任棟梁。文孫羣仰望。賢母播芬芳。遺行留徽郡。徵詩徧帝鄉。松筠圖藻采。珠玉燦詞章。一世冰霜潔。千秋俎豆香。神歸何處所。蓬島白雲長。

題龍樹院凌虛閣

高閣凌虛極目遙。浮空萬綠望迢迢。雲痕四面浮層郭。秋色三分上小橋。老葦叢深時下鷺。疏楊影瘦亂鳴蜩。平生夙有烟霞癖。坐到黃昏興未消。

消寒八詠 鈔四

簾

三冬檐雪正飛花。毳幕高懸對戶遮。翠幄別翻新式樣。青簾尙憶舊生涯。銀鉤難捲寒威重。玳押常留寶篆斜。頓覺陽春來四座。何須錦幃豔繁華。

火鍋

食具翻新式不凡。中通外直細雕嵌。用伴茶鼎還添竈。響類瓶笙乍啟函。水火無爭分界限。鹽梅得味判酸鹹。團圍圍向瓊筵坐。果腹何妨笑老饒。

冰牀

凍徹玻璃隔岸明。匡牀移向渡頭橫。何妨著地雙鞵滑。錯認凌波一葉輕。倒影恍疑冰下語。置身如在鏡中行。長安車馬知多少。穩坐輸他路坦平。

花窖

詔光釀就小陽初。矮屋三間萬卉儲。豈有奇花開頃刻。都憑活
火力吹噓。爭春聊試回天術。法古真成穴土屠。料得隔窗風雪
緊。衝寒梅萼未全舒。

品泉

小窗明淨綠雲邊。焚罷名香細品泉。別寓賞心鐘鼎外。猶堪想
像夏商前。方圓制古傳形巧。篆隸文奇結體妍。有癖何妨阿堵
物。笑他跨鶴翹腰纏。

李貽功

族姪字書勛諸生

偕友登華不注

崩劣華山秀。同人樂此登。一峯去天近。雙屐踏雲升。遠近田如
罽。荒涼寺少僧。三周車馬迹。弔古更招朋。

春午睡起

北窗高枕臥陶潛。一霎仙鄉入黑甜。午夢醒來無箇事。懶窺燕
子入風簾。

李貽經

族姪字畬卿炳南兄子諸生

小車行

正定詩續金
小車班班紅旗捲。後者爲推前爲挽。獨輪咿啞響前岡。客心轉
輓隨車轉。荆南燕北路何極。車中人而今非昔。安得此身似此
車。法天行健終不息。

題畫

杏花烟雨路彎環。翠笠輕簑叱犢還。只說田家耕作苦。那知身
在畫圖間。

李貽雋

次男字偉卿諸生

曉行

茅店催程早。登車曉夢迷。月臨荒野大。雲渡小橋低。風力盤鵬
翅。霜痕印馬蹏。行行猶未曙。十里始聞雞。

懷杜芸阜表兄

曾讀吟囊絕妙詞。浣花堂上寄相思。高情蓋世如君少。良會無
緣晤我遲。十載關山勞夢想。一尊風雨話心知。匆匆旋聽驪歌
唱。倍覺天涯悵別離。

題畫

青山數曲接芳津。流水桃花無限春。不見漁郎何處問。此中應
有避秦人。

明湖柳枝詞

楊柳千條復萬條。明湖何地不魂銷。阿儂未解離愁苦。不繫征鞍繫畫橈。

萬縷垂烟綠欲齊。鵲華橋北歷亭西。就中老樹婆娑甚。應是漁洋舊品題。

閨閣

李蘭芳

族姑母字宜芝。晚號菊逸老人。巨濤公女。諸生官睢州。

州判趙公志甲室杰母。

封孺人。著夢餘草。

姑母性耽翰墨工詩

兼通史鑑。晚年習靜。於參同契性命圭旨諸道書。靡不好學。深思。心知其義。壽至八十餘。

詠雪

天然素質重瑤京。妙品非關玉琢成。隨處留蹤終是潔。先時澤物不居名。蒼顏古柏逞奇相。鐵骨寒梅結舊盟。自愧無才難詠絮。相看冷眼倍多情。

閨中四時夜景

春

丁東玉漏滴銅龍。風送清香透綺櫳。教罷金經鸚鵡睡。梨花寂寂月溶溶。

夏

不燒紅燭不添香。竹徑風清晚納涼。卻被嫦娥留坐久。身扶花影過斜廊。

秋

篆嫋金鑪拜玉鉤。香風馥馥桂花秋。遊仙一枕來清夢。恍憶瑤臺十二樓。

冬

蘭缸藥燼篆烟殘。月姊招邀更倚欄。不管深宵寒徹骨。自收梅雪瀟龍團。

夢亡女靈蕙

清谿隔斷路東西。是也非耶一望迷。殘夢醒來雙淚冷。空梁月落曉烏啼。

月季花

一年一度鬪春光。榮落那知歲月長。偏是此花開別例。常隨月姊換新妝。

題竹朋姪婦畹芳畫蘭冊

湘管雙枝墨一池。花花葉葉寫離奇。貯香閣邃紅塵遠。一曲清琴月上時。

李氏

先姊字靜涵。紀梅岑繼室。例封孺人。姊幼年曾學詩。

記此一首。中年失所。天境遇困窮。晚年以書籍自遣。而詩不復作矣。

卽事

玉鏡臺前罷曉妝。喃喃鸚鵡喚茶湯。開簾笑問東籬菊。綻到西風幾色黃。

張衍蕙

室人字晚芳。海豐人。兩農公女。封恭人。亡室在閨時。

曾授以詩學。及歸。余但習文。紅。此事遂廢。中年多病。稍有餘暇。惟習書畫。以爲消遣。不復從事。推敲。此一首。力

于歸後。爲余口誦者。此外尙誦數首。事隔四十年。則余忘之矣。

秋夜

金粟香飄露氣清。珍珠簾外月華明。閒尋蟋蟀邀同伴。悄向花陰取路行。

李貽芸

女字簡芬。鹽山諸生。恩蔭主事。現官浙江候補知府。

孫尙紱室。封宜人。例封恭人。女幼讀書不多。並未令學詩。今來歸甯方

言。曾自爲韻語。遂命錄出數首。雖乏精思。然喜其出於天籟。姑存之。

早梅

簾外春寒透小齋。何期玉萼映瑤階。憐他早報春消息。笑折花

枝插鬢釵。

野梅

斷橋野岸夕陽天。雪後寒梅得氣先。入畫偏宜修竹外。綠陰深

護玉嬋娟。

送春

綠窗深護淨無塵。燕語呢喃來去頻。午夢初回人意倦。一簾紅

雨送殘春。



